


兩漢博聞  
二







兩漢博聞

(二)

楊侃編

# 兩漢博聞卷第四

治行曹參傳九

蕭何薨。曹參聞之。告舍人趣治行。

師古曰。舍人猶家人也。一說私屬官。主家事者也。趣讀曰促。謂速也。治行。謂修行治裝也。

獄市曹參傳

曹參屬其後相曰。以齊獄市爲寄。曰。夫獄市者。所以并容也。今君擾之。姦人安所容乎。

孟康曰。夫獄市者。兼受善惡。若窮極姦人。姦人無所容。竄久且爲亂。秦人極刑而天下畔。孝武峻法而獄繁。此其效也。師古曰。老子云。我無爲民自化。我好靜民自正。參欲以道化爲本。不欲擾其末也。

事刃。劇通傳十五。

劇通爲范陽令。曰。足下殺人之父。孤人之子。慈父孝子。不敢事刃於公之腹者。畏秦法也。

李奇曰。東方人以物置地中爲事。師古曰。事音側吏反。字本作傳。

封人頸。王莽傳六十九中。

王莽下書曰。妄封人頸。得錢者去。

如淳曰。權臣妄以法枉其人爲僮僕。封其頸。以別之也。得贖錢。乃去封。



阪上走丸。劄通傳。

劄通曰。范陽令先下而身富貴。邊城必相率降。如阪上走丸也。

師古曰。言乘勢便易。

申子學。張歐傳十六。

張歐。孝文時以治刑名侍太子。

師古曰。劉向別錄云。申子學。號曰刑名。刑名者。循名以責實。其尊君卑臣。崇上抑下。合於六經。說者云。刑。刑家名。名家。即太史公所論六家之二也。此說非。歐音驅。

任俠。季布傳七。

應劭曰。任。謂有堅完可任託以事也。如淳曰。相與信爲任。同是非爲俠。師古曰。任。謂任使其氣力。俠之言。挾也。以權力俠輔人也。任。晉人禁反。俠。晉下頰反。

冠玉。陳平傳十。

或譏陳平曰。平雖美丈夫。如冠玉耳。其中未必有也。

孟康曰。飾冠以玉。光好外見。中非所有也。

端門。周勃傳十。

師古曰。端門。殿之正門。

從理入口。周勃傳。

許負相周亞夫。君後三歲而侯。侯八歲爲將相。後九歲而餓死。負指其口曰。從理入口。此餓死法也。亞夫果封條侯。爲將軍。拜太尉。下廷尉。不食五日死。

師古曰。從豎也。音子容反。

簿責。周勃傳。

周亞夫下吏。吏簿責亞夫。

如淳曰。簿。問其辭情。師古曰。簿。問者。書之於簿。一一問之也。

四皓。王賈兩龔傳序四十二。

漢興有東園公、綺里季、夏黃公、甬里先生。

師古曰。四皓稱號。本起於此。更無姓名可稱。知此蓋隱居之人。匿跡遠害。不自標顯。祕其氏族。故史傳無得而詳。至於後代。皇甫謐圈稱之徒。及諸地理書說。竟爲四人。施安姓字。自相錯互。語又不經。班氏不載於書。諸家皆臆說。今並棄略。一無取焉。

衡概。王吉傳四十二。司馬相如傳二十七下。

師古曰。衡。馬衡也。概。車鉤心也。張揖以概爲馬之長衡。非也。概音其月反。又注司馬相如諫獵書曰。衡槩之變。言馬衡或斷鉤心。或出。則致傾敗。以傷人也。

詐僞萌生。王吉傳。

師古曰：萌生，言其事出如草木之初生。

翁主。王吉傳。高帝紀又注。

漢家列侯尚公主，諸侯則國人承翁主。

晉灼曰：娶天子女曰尚公主，國人娶諸侯女曰承翁主，尚承皆卑下之名也。師古曰：翁主者，言父自主婚也。

王主。成帝紀建始元年。

張晏曰：王主，王之女也。師古曰：王主，即翁主也。主自主婚，故曰王主。

軌躅。敘傳七上。

伏周孔之軌躅。

鄭氏曰：躅，迹也。三輔謂牛蹄處爲躅。音丈欲反。

偶人。公孫賀傳三十六。

朱安世自獄中上書，告公孫賀之子敬聲與陽石公主私通，及使人巫祭祠詛上，且上甘泉，當馳道。理偶人，賀父子死獄中，家族巫蠱之禍，起自朱安世。成於江充，遂及公主、皇后、太子，皆敗。師古曰：刻木爲人，象人之形，謂之偶人，偶，並也，對也。

左驗。楊惲傳三十六。張湯傳二十九。

楊惲下廷尉。廷尉于定國考問。左驗明白。

師古曰。左。證左也。言當時在其左右見此事者也。又張湯傳注。李奇曰。左。證左也。師古曰。謂之左者。言除罪人正身之外。又取其左右者考問也。

城門候。蔡義傳三十六。

師古曰。門候。主候時而開閉也。

橋正。劉風薨傳三十六。

橋當世反諸正。

師古曰。正曲曰橋。橋讀與矯同。其字從手。

小生。朱雲傳三十七。

丞相薛宣留朱雲宿。因謂曰。且留我東閣。可以觀四方奇士。雲曰。小生迺欲相吏邪。宣不敢復言。

師古曰。小生。謂其新學後進。言欲以我爲吏乎。

畔換。敘傳七十下。

項氏畔換。黜我巴漢。

孟康曰。畔。反也。換。易也。不用義帝要換易與高祖漢中也。師古曰。此說非也。畔換。強恣之貌。猶言跋

扈也。詩大雅皇矣篇曰：無然畔換。

君侯。劉屈氂傳三十六。

如淳曰：漢儀注：列侯爲丞相稱君侯。師古曰：惲傳：邱常謂惲爲君侯。是則通呼列侯之稱耳。非必丞相也。

子絲。敘傳。

子絲慷慨。

師古曰：爰盎字絲。此加子者。是嘉稱以偶句耳。

行馳道。鮑宣傳四十五。

丞相孔光四時行園陵官屬。以令行馳道中。

如淳曰：令諸侯有制得行馳道中者。行旁道。無得中央三丈也。

成帝紀云：不敢絕馳道。

應劭曰：馳道。天子所行道也。若今之中道。

丈人。疏廣傳四十一。

師古曰：丈人。嚴莊之稱也。故親而老者皆稱焉。

鉦鼓。東方朔傳三十五。平帝紀元始二年。



師古曰。鉦鼓之教。鉦鼓所以爲進退士衆之節也。

平帝紀。遣執金吾侯陳茂行邊兵。假以鉦鼓。

應劭曰。將帥乃有鉦鼓。今茂官輕兵少。又但往諭曉之耳。所以假鉦鼓者。欲重其威也。鉦者。鏡也。似鈴柄中上下通。師古曰。鉦音征。鏡音女交反。

亞將。灌嬰傳十二。

虜亞將周蘭。

師古曰。亞。次也。

射鵰。李廣傳二十四。

文穎曰。鵰。鳥也。故使善射者射之。師古曰。鵰。大鷲鳥也。一名鷲。黑色。翮可以爲箭。羽音彫。

蘧蔭。師古曰。蘧蔭。口柔。觀人顏色而爲辭佞也。

闔尹。敘傳下。

師古曰。謂宦人爲闔者。言其精氣奄閉不泄也。一曰主奄閉門者。尹。正也。

奪適。梅福傳三十七。

諸侯奪宗。聖庶奪適。

如淳曰：奪宗始封之君，尊爲諸侯，則奪其舊爲宗子之事也。奪適，文王舍伯邑考而立武王是也。孔子雖庶，可爲殷後。師古曰：適讀曰嫡。

祁連山，霍去病傳二十五。

霍去病出北地，遂深入，至祁連山。

師古曰：祁連山，卽天山也。匈奴呼天爲祁連，祁音上夷反。

躡鞠，去病傳。

去病在塞外，卒乏糧，而去病尙穿城躡鞠也。

服虔曰：穿地作鞠室也。師古曰：鞠以皮爲之，實以毛，蹙躡而戲也。躡音徒臘反，鞠音距六反。

冢象祁連，去病傳。

霍去病薨，上悼，發屬國玄甲軍陳，自長安至茂陵，爲冢象祁連山。

師古曰：在茂陵旁，冢上有豎石，冢前有石人馬者，是也。

求雨，董仲舒二十六。

董仲舒爲江都相，治國以春秋災異之變，推陰陽所以錯行，故求雨，閉諸陽，縱諸陰，其止雨反是。

師古曰：若謂閉南門，禁舉火，及開北門，水灑人之類，是也。

旬歲，翟方進傳五十四。

翟方進爲丞相。司直。旬歲間免兩司隸。朝廷憚之。

師古曰。旬。徧也。滿也。旬歲。猶言滿歲也。若十日之一周。

泉山。朱買臣傳三十四。

東越王居保泉山。

師古曰。泉山。卽今泉州之山也。保者。保守之以自固也。

承明廬。嚴助傳三十四。

賜會稽太守嚴助詔曰。君厭承明之廬。

張晏曰。承明廬。在石渠閣外。直宿所止。曰廬。

威棱。李廣傳二十四。

威棱。愴乎鄰國。

李奇曰。神靈之威曰棱。愴。動也。愴音徒濫反。

鑿坏。楊雄傳五十七下。

應劭曰。鑿坏。謂顏闔也。魯君聞顏闔賢。欲以爲相。使者往聘。因鑿後垣而亡也。坏音陪。又音普。回反。

宦騎。蘇武傳二十四。

師古曰。宦騎。宦者而爲騎也。

周陸楊雄傳。

以罔爲周陸。

李奇曰。陸。遮禽獸圍陳也。陸音祛。

旄旗。藝文志十。

師古曰。畫龜蛇曰旄。鳥隼曰旗。

諡。司馬相如傳二十七下。

師古曰。諡者。行之迹也。

文鷁。相如傳二十七。

浮文鷁。

張揖曰。鷁。水鳥也。畫其象於船首。淮南子曰。龍舟鷁首。天子之乘也。

榜人。相如傳。

榜人歌。

張揖曰。榜。船也。月令云。命榜人。榜人。船長也。主倡聲而歌者也。榜音謗。又方孟反。

屬車。相如傳二十七下。

應劭曰。古者諸侯。武車九乘。秦滅九國。兼其車服。漢依秦制。故大駕屬車八十一乘。師古曰。屬者。言

相連續不絕也。

反騷。廣騷。畔牢愁。楊雄傳五十七上。

楊雄讀屈原離騷文。未嘗不流涕。以爲君子遇不遇命也。何必湛身哉。湛讀曰沈。謂投水而死。迺作書。往往摭離騷文而反之。自岷山投書江流。以弔屈原。名曰反離騷。又旁離騷作重一篇。名曰廣騷。又旁惜誦以下。至懷沙一卷。名曰畔牢愁。

師古曰。旁。依也。音步浪反。其下類此。重音直用反。李奇曰。畔。離也。牢。聊也。與君相離愁而無聊也。師古曰。惜誦懷沙。皆屈原所作九章中名也。

品藻。楊雄傳五十七下。

仲尼之後。訖於漢。道德行顏閔。股肱蕭曹。爰及名將尊卑之條。稱述品藻。讓淵濤。

師古曰。品藻者。定其差品及文質。

咫尺之書。韓信傳四。

奉咫尺之書。以使燕。燕必不敢不聽。

師古曰。八寸曰咫。咫尺者。言其簡牘。或長咫。或長尺。喻輕率也。今俗言尺書。或言尺牘。蓋其遺語耳。

枉矢。劉向傳六。

枉矢夜光。



應劭曰。流星也。其射如矢。蛇行不正。故曰枉矢流。以亂伐亂。蘇林曰。有聲爲天狗。無聲爲枉矢。  
天狗。劉向傳。

孝昭時。有大星如月。西行。衆星隨之。此爲特異。孝宣興起之表。天狗夾漢而西。

李奇曰。流星也。下墮地爲天狗。皆祲星。

常伯。谷永傳五十五。

戴金貂之節。執常伯之職。

師古曰。常伯。侍中也。伯。長也。常。使長事者也。一曰。常。任使之。人。此爲長也。

法從。楊雄傳五十七上。

趙昭儀方大幸。每上甘泉。常法從。

師古曰。法從者。以言法當從耳。非失禮。一曰。從法駕也。

殊庭。郊祀志五下。

師古曰。殊庭。蓬萊中仙人庭也。

首級。衛青傳二十五。

斬輕銳之卒。捕伏聽者。三千一十七級。

張晏曰。伏於隱處聽軍虛實。師古曰。本以斬敵一首。拜爵一級。故謂一首爲一級。因復名生獲一爲

一級也。秦法斬首一賜爵一級。

裨王衛青傳

漢兵圍右賢王。右賢王驚夜逃潰圍北去。輕騎校尉郭成等追數百里弗得。得右賢裨王十餘人。  
師古曰。裨王。小王也。若言裨將也。

大黃李廣傳二十四

李廣自以大黃射其裨將。

服虔曰。黃肩弩也。孟康曰。太公陷堅卻敵。以大黃參連弩也。晉灼曰。黃肩卽黃間也。大黃其大者也。  
師古曰。服晉二說是也。

從橫短長術張湯傳二十九 主父偃傳三十四上 藝文志下

邊通學短長官至濟南相。

應劭曰。短長術。興於六國時。短長其語。隱謬用相激怒也。張晏曰。蘇秦張儀之謀。趣彼爲短。歸此爲長。戰國策名短長術也。

主父偃學短長從橫術。

藝文志云。從橫家者流。蓋出於行人之官。孔子曰。誦詩三百。使於四方。不能顯對。雖多亦奚以爲。  
師古曰。謂人不達於事。誦詩雖多。亦無所用。

三尺法。杜周傳二十。

客謂廷尉杜周曰：君爲天下決平，不循三尺法，專以人主意指爲獄，獄者固如是乎？

孟康曰：以三尺竹簡書法律也。

箴石。藝文志。

師古曰：箴，所以刺病也。石，謂砭石，卽石箴也。古者攻病則有砭，今其術絕矣。箴音之林反，砭音彼廉反。

襃然。董仲舒傳二十六。

子大夫襃然爲舉首。

張晏曰：襃，進也。爲舉賢良之首也。師古曰：襃然，盛服貌也。

數奇。李廣傳。

大將軍陰受上指，以爲李廣數奇。

孟康曰：奇，隻不耦也。如淳曰：數爲匈奴所敗，爲奇不耦。師古曰：言廣命隻，不耦合也。孟說是矣。數音

所角反。奇音居宜反。

居無何。李廣傳。

師古曰：無何，謂未多時也。

烏號司馬相如傳二十七上  
郊祀志五上

左烏號之雕弓

應劭曰。楚有柘桑。烏栖其上。支下著地。不得飛。欲墮號呼。故曰烏號。

郊祀志。黃帝采首山銅。鑄鼎於荆山下。鼎既成。有龍垂胡髯。下迎黃帝。黃帝上騎。羣臣後宮從上。龍七十餘人。龍迺上去。餘小臣不得上。迺悉持龍頰。龍頰拔墮。墮黃帝之弓。百姓仰望黃帝既上天。乃抱其弓與龍頰號。故後世名其處曰鼎湖。其弓曰烏號。於是天子曰。嗟夫。誠得如黃帝。吾視去妻子如脫屣耳。

師古曰。屣。小履。脫屣者。言其便易無所顧也。

不世之功後漢隗囂傳三附

足下將建伊呂之業。宏不世之功。

注云。不世者。言非世之所常有也。

蕭蕭郊祀志

蕭蕭及蕭

師古曰。鼎絕大者謂之蕭。圓鼻上謂之蕭。蕭音乃代反。蕭音茲。

十二樓郊祀志五下

方士有言黃帝時爲五城十二樓以候神人名曰迎年。

應劭曰昆侖玄圃五城十二樓仙人之所常居師古曰迎年若云祈年。

箭服相如傳

右夏服之勁箭。

伏儼曰服盛箭器也夏后氏之良弓名繁弱其矢亦良卽繁弱之箭服也師古曰箭服卽今之步叉也。

伏祠郊祀志五上

秦德公作伏祠。

孟康曰六月伏日也周時無至此乃有之師古曰伏者謂陰氣將起迫於殘陽而未得升故爲藏伏因名伏日也立秋之後以金代火金畏於火故至庚日必伏庚金也。

梟鏡郊祀志

人有言古天子常以春解祠祠黃帝用一梟破鏡。

張晏曰黃帝五帝之首也春歲之始也梟惡逆之鳥方士虛誕云以歲始破除凶災令神仙之帝食

惡逆之物使天下爲逆者破滅訖竟無有遺育也孟康曰梟鳥名食母破鏡獸名食父黃帝欲絕其

類使百吏祠皆用之破鏡如羈而虎眼如淳曰漢使東郡送梟五月五日作梟羹以賜百官以其惡



鳥故食之也。師古曰：解祠者，謂祠祭以解罪求福。

縉紳。郊祀志。

李奇曰：縉，插笏於紳。紳，大帶也。臣瓚曰：縉，赤白色。紳，大帶也。左氏傳有縉雲氏。師古曰：李曰：縉，插是也。字本作搢。插笏於大帶與革帶之間耳。或作薦紳者，亦謂薦笏於紳帶之間。其義同。

縣蕞。叔孫通傳十三。

叔孫通與其弟子百餘人爲縣蕞野外。

應劭曰：立竹及茅索營之，習禮儀其中也。如淳曰：謂以茅翦樹地爲纂位尊卑之次也。春秋傳曰：置茅絕。師古曰：蕞與絕同。並子悅反。如說是也。

九賓。叔孫通傳。

大行設九賓臚句傳。

蘇林曰：上傳語告下爲臚，下告上爲句也。韋昭曰：大行掌賓客之禮。今之鴻臚也。九賓，則周禮九儀也。謂公侯伯子男孤卿大夫士也。

鷓夷。范蠡傳六十一。鄒陽傳二十八。

師古曰：范蠡自號鷓夷。子皮者，言若盛酒之鷓夷，多所容受，而可卷懷，與時張弛也。鷓夷，皮之所爲。故曰子皮。應劭曰：吳王取馬革爲鷓夷，受伍子胥。沈之江。鷓夷，榼形。師古曰：卽今之盛酒鷓夷勝。

傾蓋鄒陽傳。

鄒陽上梁孝王書語曰。白頭如新。傾蓋如故。何則。知與不知也。

孟康曰。初相識。至白頭。不相知。文穎曰。傾蓋。猶交蓋駐車也。

統斷幹。枚乘傳二十一。

泰山之霤穿石。單極之統斷幹。

孟康曰。西方人名屋梁爲極。單。一也。一說。梁謂井鹿盧也。言鹿盧爲綆。索久鏤斷。井幹也。晉灼曰。統。古綆字也。單。盡也。盡極之綆斷。幹。井上四交之幹。常爲汲索所契傷也。師古曰。晉說近之。幹者。交木井上以爲欄者也。孟云。鹿盧失其義也。統。綆皆音鯁。鏤契皆刻也。音口計反。

文甲。東方朔傳。後漢杜篤傳。後漢王符傳。

師古曰。瑋。瑁。文甲也。廣志曰。瑋。瑁形似龜。出南海。吳錄曰。瑋。瑁似龜而大。

五諸侯。高帝紀二年。

羽雖聞漢東。旣擊齊。欲遂破之。而後擊漢。漢王以故得劫五諸侯兵。

師古曰。五諸侯者。謂常山。河南。韓。魏。殷也。此年十月。常山王張耳降。河南王申陽降。韓王鄭昌降。三月。魏王豹降。虜殷王卬。

復除。高帝紀二年。

蜀漢民給軍事勞苦。復勿租稅二歲。

師古曰：復者，除其賦役也。音方目反。

拔城。高帝紀秦二年。

攻碭。三日拔之。

師古曰：拔者，克城邑而取之。言若拔樹木，并得其根。

穀。嗛。郊祀志五下。

師古曰：嗛，少意也。言穀稼少。嗛音苦篋反。

急就篇。藝文志十。

元帝時，黃門令史游作急就篇。成帝時，李長作元尚篇，皆蒼頡中正字也。

八體。藝文志。

章昭曰：八體，一曰大篆，二曰小篆，三曰刻符，四曰蟲書，五曰摹印，六曰署書，七曰殳書，八曰隸書。

六體。藝文志。

六體者，古文、奇字、篆書、隸書、繆篆、蟲書。

師古曰：古文謂孔子壁中書，奇字即古文而異者也。篆書謂小篆，蓋秦始皇使程邈所作也。隸書亦程邈所獻，生於徒隸，從簡易也。始造隸書，起於官獄多事，苟趨省易，施之於徒隸也。繆篆謂其文屈曲纏繞，所以摹印章也。蟲

書謂蟲鳥之形所以書幡信也。

秦篆。藝文志。

史籀篇者。周時史官教學童書也。與孔氏壁中古文異體。蒼頡七章者。李斯所作也。博士七章者。胡毋敬所作也。文字多取史籀篇。而篆體復頗異。所謂秦篆也。

竹皮冠。高帝紀。

應劭曰。以竹始生皮作冠。今鵠尾冠是也。文穎曰。高祖居貧。志大。取其約省。與衆有異。韋昭曰。竹皮竹筴也。今南夷取竹。紉時續以爲帳。師古曰。竹皮。筴皮。謂筴上所解之籜耳。非竹筴也。今人亦往往爲筴皮巾。古之遺制也。

能。高帝紀。

吾非敢自愛。恐能薄。

師古曰。能。謂材也。能。本獸名。形似熊。足似鹿。爲物豎中而強力。故人謂有賢材者皆爲能。

擊筑。高帝紀十二年。後漢延篤傳五十四。

高祖過沛。留置酒沛宮。酒酣。上擊筑而歌。

鄧展曰。筑。音竹。應劭曰。狀似琴。而大頭安弦。以竹擊之。故名曰筑。師古曰。今筑形似瑟。而細頸也。後漢書注云。說文曰。筑。五弦之樂。沈約宋書曰。筑。不知誰所造也。史記唯云。高漸離擊筑。案今筑形似。

箏有項有柱。史記荆軻至燕日與屠狗及高漸離擊筑。荆軻和而歌於市中相樂已而相泣。旁若無人。

三雍。河間獻王傳二十三。

河間獻王武帝時來朝。獻雅樂對三雍宮。

應劭曰。辟雍。明堂靈臺也。雍。和也。言天地君臣人民皆和也。又漢書音義曰。皆叶天人雍和之氣爲之。故謂三雍。

蹲鴟。貨殖傳六十一。

蜀卓氏曰。吾聞崦山之下沃壑。下有蹲鴟。至死不飢。

師古曰。蹲鴟謂芋也。其根可食。以充糧。故無飢年。華陽國志曰。汝山郡都安縣有大芋。如蹲鴟也。

感槩。郭解傳六十二。季布傳七。

郭解少時。陰賊感槩。師古曰。陰賊者。陰懷賊害之意也。感槩者。感意氣而立節槩也。

季布傳贊曰。婢妾賊人。感槩而自殺。非能勇也。

五陵。原涉傳六十二。

師古曰。五陵謂長陵、安陵、陽陵、茂陵、平陵也。班固西京賦曰。南望杜霸。北眺五陵。是知霸陵、杜陵。非

此五陵之數也。而說者以爲高祖以至茂陵爲五陵，失其大意。

二府。劉向傳六。

如淳曰：二府，謂丞相、御史大夫府也。亦曰兩府也。

交戟。劉向傳。

佞邪與賢臣，並在交戟之內。

師古曰：交戟，謂宿衛者。

置醴。楚元王傳六。

魯穆生受詩於浮丘伯。楚元王好詩，以穆生爲中大夫。穆生不嗜酒，元王每置酒，常爲穆生設醴。及王戊卽位，常設，後忘設焉。穆生退曰：可以逝矣。醴酒不設，王之意怠。楚人將鉗我於市，稱疾臥。

師古曰：醴，甘酒也。少麴多米，一宿而熟，味齊也。

枕中書。劉向傳。

宣帝興神仙方術之事，而淮南有枕中鴻寶苑祕書，言神仙使鬼物爲金之術，及鄒衍重道延命方，世人莫見，而劉更生父德武帝時治淮南獄，得其書，更生幼而讀誦，以爲奇，獻之。言黃金可成，上令典尙方鑄作事，費甚多方不驗。

師古曰：鴻寶苑祕書，並道術篇名，藏在枕中，言常存錄之，不漏泄也。

印劄韓信傳四

韓信曰。項王使人有功當封爵。刻印劄忍不能予。

蘇林曰。劄音劄角之劄。劄與搏同。手弄角訛。不忍授也。師古曰。劄音五九反。搏音大官反。

馮軾馮食其傳十三

酈食其馮軾下齊七十餘城。

師古曰。馮讀曰憑。憑據也。軾車前橫板隆起者也。云憑軾者。言但安坐乘車而游說。不用兵衆。

間路韓信傳 黥布傳四

韓信欲東下井陘擊趙。李左車說趙王曰。願假臣等兵三萬人。從間路絕其輜重。

師古曰。間路。微路也。

黥布先從間道破關下軍。

師古曰。間道。微道也。

葬驪山劉向傳

秦始皇葬於驪山之阿。下錮三泉。上崇山墳。高五十餘丈。石椁爲游館。人膏爲燈燭。水銀爲江海。黃金爲鳧雁。珍寶之藏。機械之變。棺槨之麗。宮館之盛。不可勝原。又多殺宮人。生蕤工匠。計以萬數。驪山之作未成。而周章百萬之師至其下矣。項籍燔其宮室。往者咸見發掘。其後牧兒亡羊。羊入其鑿。牧者持

火照求羊失火燒其藏櫛。

師古曰石櫛爲游館者多累石於壙中以爲離宮別館也孟康曰作機發木人之屬盡其巧變也晉灼曰始皇本紀命匠作機弩矢有所穿近輒射之又言工匠爲機咸皆知之已下閉羨門皆殺工匠也師古曰不可勝原者言不能盡其本數也周章陳勝之將也往者皆發掘之以求財物也鑿謂所穿冢藏者音在剝反。

騶騎惠帝紀 東方朔傳又注

應劭曰騶騶騎也師古曰騶本廐之馭者後又令爲騎因爲騶騎耳。

凌室惠帝紀 武帝紀又注

師古曰凌室藏冰之室也。

間者文帝紀

師古曰間者猶言中間之時也。

弋綈文帝紀贊

文帝身衣弋綈。

如淳曰弋阜也賈誼曰身衣阜綈師古曰弋黑色也綈厚繒音大奚反。

太夫人文帝紀



如淳曰。列侯之妻稱夫人。列侯死。子復爲列侯。乃得稱太夫人。子不爲列侯。不得稱也。  
醪。文帝紀。

師古曰。醪。汗滓酒也。

指縱。蕭何傳九。

功臣皆曰。蕭何未有汗馬之勞。居臣等上何也。上曰。諸君知獵乎。夫獵。追殺獸者狗也。而發縱指示獸處者人也。

師古曰。發縱。謂解絙而放之也。指示者。以手指示之。俗言放狗。縱音子用反。而讀者乃爲蹤蹟之蹤。非也。書本皆不爲蹤字。自有逐蹤之狗。不待人發也。

棧道。高帝紀。

張良曰。說漢王燒絕棧道。

師古曰。閣道也。

鳩酒。齊悼惠王傳八。

應劭曰。鳩鳥。黑身赤目。食蝮蛇野葛。以其羽畫酒中。飲之立死。

引強。周勃傳十。

周勃材官引強。

服虔曰能引強弓弩官也。孟康曰如今挽強司馬也。師古曰強音其兩反。

殿兵。周勃傳。

周勃擊章邯車騎殿。

師古曰殿填也。謂鎮軍後以扞敵。勃擊破章邯之殿兵也。殿音丁見反。

鈍如椎。周勃傳。

周勃不好文學。每召諸生說士。東鄉坐責之。趣爲我語。其樸椎少文如此。

臣瓚曰。令直言勿稱經也。師古曰。趣讀曰促。謂令速言也。服虔曰。謂訥鈍也。應劭曰。今俗名拙語爲

椎儲。師古曰。椎謂樸鈍如椎也。音直推反。

酒家保。樂布傳七。

樂布窮困。賣庸於齊。爲酒家保。

孟康曰。酒家作保。保庸也。可保信。故謂之保。師古曰。謂庸作受顧也。爲保。謂保可任使。

遮虜障。李陵傳二十四。

師古曰。障者塞上險要之處。往往修築。別置候望之人。所以自障蔽而伺敵也。遮虜障名也。

穹廬。匈奴傳六十四上。

師古曰。穹廬。旃帳也。其形穹隆。故曰穹廬。

成蹊。李廣傳贊二十四。

諺曰。桃李不言。下自成蹊。

師古曰。蹊。謂徑道也。言桃李以其華實之故。非有所招呼。而人爭歸。趨來往不絕。其下自然成徑。以喻人懷誠信之心。故能潛有所感也。

爰臂。李廣傳。

李廣爰臂。

如淳曰。臂如猿臂通肩也。

厥角。諸侯王表二。

王莽因母后之權。漢諸侯王厥角。諸首。

應劭曰。厥者。頓也。角者。額角也。諸首。首至地。言王莽漸漬威福。漢之王侯莫敢怨望。皆頓角。諸首至地。而上其鬣。綬也。晉灼曰。厥猶豎也。叩頭則額角豎。諸與稽同。

門牡飛。五行志七中之上。

成帝元延元年。長安章城門。門牡自亡。函谷關。次門牡亦自亡。

晉灼曰。章城門者。西出南頭第一門也。師古曰。牡。所以下閉者也。亦以鐵爲之。韋昭曰。次門者。函谷關邊小門也。師古曰。非行人所由。蓋關司曹府所在之門也。

京房易傳曰。飢而不損。茲爲泰。厥災水。厥咎牡亡妖。辭曰。關動牡飛。辟爲士道。臣爲非。厥咎亂臣謀篡。故谷永對曰。章城門。通路寢之路。函谷關。距山東之險。城門關。守國之固。固將去焉。故牡飛也。

九流藝文志十

儒家者流。出於司徒之官。道家者流。出於史官。陰陽家者流。出於羲和之官。法家者流。出於理官。名家者流。出於禮官。墨家者流。出於清廟之守。從橫家者流。出於行人之官。雜家者流。出於議官。農家者流。出於農稷之官。小說家者流。出於稗官。諸子十家。其可觀者九家而已。皆起於王道旣微。諸侯力政。時君世主好惡殊方。是以九家之術。蠡出並作。

師古曰。稗音穉。稗之稗。稗官。小官。漢名臣奏。唐林請省置吏公卿大夫至都官。稗官各減什三。是也。初用夏正。高里。武帝紀。

太初元年冬十月。行幸泰山。十一月甲子朔旦冬至。祀上帝於明堂。十二月禮高里。

應劭曰。初用夏正。以正月爲歲首。故改年爲太初也。高里者。伏儼曰。山名。在泰山下。師古曰。此高字。自作高下之高。而死人之里。謂之蒿里。或呼爲下里者也。字卽爲蓬蒿之蒿。或者旣見太山神靈之府。高里山又在其旁。卽誤以蒿里爲蒿里。混同一事。文學之士。共有此謬。陸士衡尙不免。況其餘乎。今流俗書本。此高字。有作蒿者。妄加增耳。

始元元年益州、牂柯等皆反。遣水衡都尉呂破胡、募吏民及發犍爲蜀郡苑馬擊益州。大破之。

應劭曰：舊時郡國皆有材官騎士，以赴急難。今夷反，常兵不足以討之，故權選取精勇，聞命奔走。故謂之奔命。師古曰：犇，古奔字耳。犍音虔。又鉅言反。

封君食貨志四下。

師古曰：封君受封邑者，謂公主及列侯之屬也。

卽山鑄錢食貨志。

建元以來，用度少，縣官往往卽多銅山而鑄錢。

師古曰：就多銅之山而鑄錢也。

摩錢質取鉛食貨志。

姦或盜摩錢質而取鉛。

臣瓚曰：許慎云：鉛，銅屑也。摩錢漫而以取其屑，更以鑄錢。西京黃圖敝曰：民摩錢取屑是也。師古曰：

鉛音谷。

皮幣食貨志。

有司言曰：古者皮幣，諸侯以聘享，金有二等，黃金爲上，白金爲中，赤金爲下。今半兩錢法重四銖，而姦或盜摩錢質而取鉛，錢益輕薄而物貴，則遠方用幣，煩費不省，乃以白鹿皮方尺，緣以績，爲皮幣，直四

十萬。王侯宗室朝覲聘享，必以皮幣薦璧，然後得行。又造銀錫白金，以爲天用，莫如龍，地用莫如馬，人用莫如龜。故白金三品，其一曰重八兩圓之，其文龍，名曰白撰，直三千；二曰以重差小方之，其文馬，直五百；三曰復小橢之，其文龜，直三百。令縣官銷半兩錢，更鑄三銖錢，重如其文，盜鑄諸金錢罪皆死，而吏民之犯者不可勝數。

孟康曰：白金，銀也；赤金，丹陽銅也。鄭氏曰：半兩錢，其文爲半兩，實重四銖也。師古曰：績繡也。繪，五采而爲之。如淳曰：銀錫白金者，雜鑄銀錫爲白金也。晉灼曰：以重差小之者，以半斤之重差爲三品，則中品六兩，下品四兩也。師古曰：橢，音他果反，橢圓而長之也。

苑馬 景帝紀中六年

匈奴入鴈門，至武泉，入上郡，取苑馬。

如淳曰：漢儀注：太僕牧師諸苑三十六所，分布北邊西邊，以郎爲苑監官，奴婢三萬人，養馬三十萬頭。師古曰：武泉，雲中之縣也。養鳥獸者，通名爲苑，故謂牧馬處爲苑。

商顏 溝洫志九

發卒萬人，穿渠自徵引洛水至商顏下。

師古曰：徵，音懲，卽今所謂澄城也。商顏，商山之顏也。謂之顏者，譬人之顏額也。亦猶山領象人之額領。

黔首。藝文志十。後漢光武紀。

師古曰。秦謂人爲黔首。言其頭黑也。又光武建武五年注。秦呼人爲黔首。謂奴爲蒼頭。以別於良人也。

鷩冠。藝文志。後漢志三十。

楚人居深山。以鷩爲冠。師古曰。以鷩鳥羽爲冠。

後漢志。武冠加雙鷩尾。豎左右爲鷩冠。五中郎將羽林左右監等皆冠鷩冠。鷩者。勇雉也。其鬪對一死乃止。故趙武靈王以表武事奉施之焉。

徐廣曰。鷩似黑雉。出於上黨。荀綽晉百官表注曰。冠插兩鷩。鷩鳥之暴疏者也。每所櫻撮。應爪摧劓。天子武騎。故以冠焉。傅玄賦注曰。羽騎騎者戴鷩。

雉經。馮奉世傳贊四十九。

申生雉經。

師古曰。國語云。晉獻公黜太子申生。乃雉經於新城之廟。蓋爲俛頸閉氣而死。若雉之爲。

牢讓。

牢讓爵位。

咀藥。王嘉傳五十六。

王嘉引藥杯以擊地曰三公負國當伏刑都市何謂咀藥而死。

師古曰咀嚼也。

劍璣王莽傳六十九上。

王莽爲新都侯就國孔休守新都相莽盡禮待之緣恩意進玉具寶劍欲以爲好休不肯受莽因曰誠見君而有癩美玉可滅癩欲獻其瑑卽解其瑑休復辭莽曰君嫌其價邪遂椎碎之自裹以進休休乃受及莽徵去欲見休休稱疾不見。

師古曰癩創痕也服虔曰瑑音衛蘇林曰劍鼻也師古曰瑑本作璣後傳寫訛也瑑自彫瑑字耳音篆說文云劍鼻玉也從玉彘音直例反。

秒忽絞傳七十下。

元元本本數始於一產氣黃鍾造計秒忽。

劉德曰秒禾芒也忽蜘蛛網細者也師古曰秒音眇其字從禾。

置亭馮奉世傳劉屈氂傳又注。

師古曰置謂置驛之所也。

離飢寒蕭望之傳四十八。

邊郡數被兵離飢寒。



師古曰。離。遭也。

金選之品。蕭望之傳。

西羌反。張敞上書言。縣官穀度。不足以振之。度徒各反。願令諸有臬。非盜受財殺人及犯法不得赦者。皆得以差入穀贖罪。天子下其議。兩府丞相御史以難問敞。敞曰。因此令贖。其便明甚。何化之所亂。甫刑之罰。小過赦。薄罪贖。有金選之品。

師古曰。呂侯爲周穆王司寇。作贖刑之法。謂之呂刑。後改爲甫侯。故又稱甫刑也。應劭曰。選音刷。金銖兩名也。師古曰。音刷是也。字本作銖。銖卽鉞也。其重十二銖。二十五分銖之十三。一曰重六兩。呂刑曰。墨辟疑赦。其罰百鍰。劓辟疑赦。其罰惟倍。剕辟疑赦。其罰倍差。宮辟疑赦。其罰六百鍰。大辟疑赦。其罰千鍰。是其品也。

名數。孔光傳五十一。

元帝賜霸第一區。徒名數於長安。

師古曰。名數。戶籍也。

首鼠兩端。田蚡灌夫傳二十二。

武安侯田蚡。始未貴時。往來侍酒於魏侯竇嬰所。跪起如子姓。及蚡貴。士吏趨勢利者。皆去嬰而歸蚡。蚡日益橫。灌夫者。父張孟。嘗爲灌嬰舍人。得幸。故蒙灌氏姓。吳楚反。夫父子俱有功。武帝時。夫位至太

僕後蚡請嬰城南田。嬰曰：老僕雖棄，將軍雖貴，寧可以勢相奪乎？不許。夫聞怒，蚡聞嬰，夫怒不與田，蚡亦怒。兩人有隙，蚡取燕王女爲夫人，嬰與夫俱往賀，遂縛夫居室，遣吏遂捕諸灌氏支屬，皆得棄市罪。嬰救夫，因言蚡短，兩人廷辨之。蚡罷朝，召御史大夫韓安國，怒曰：與長孺共治一秃翁，何爲首鼠兩端？嬰夫皆棄市。

師古曰：姓，生也。言同子禮，若己所生也。居室，署名屬少府。長孺，安國字也。張晏曰：秃翁，言嬰年老嗜酒，頭秃，言當共治一秃翁也。服虔曰：首鼠，一前一卻也。

睢陽曲 梁孝王傳十七

梁孝王築東苑三百餘里，廣睢陽城七十里。

師古曰：更廣大之也。晉太康地記云：城方十三里，梁孝王築之，鼓倡節杵而後下，和之者稱睢陽曲。今踵以爲故，今之樂家睢陽曲，是其遺音。

# 兩漢博聞卷第五

請閒文帝紀。愛盎傳十九。

代王至渭橋。羣臣拜謁。太尉勃進曰。願請閒。宋昌曰。所言公。公言之。所言私。王者無私。

師古曰。閒。容也。猶今言中間也。請容暇之頃。當有所陳。不欲於衆顯論也。又注云。欲因閒隙。私有所白也。

鳴鏑匈奴傳六十四上。

冒頓作鳴鏑。令曰。鳴鏑所射。而不悉射者。斬已。而冒頓以鳴鏑自射其善馬。復射其愛妻。左右或莫敢射。皆斬之。後獵。以鳴鏑射煞其父頭曼自立。

應劭曰。鳴鏑。鸞箭也。鸞音呼交反。師古曰。曼音莫安反。

持滿匈奴傳。

持滿傳矢外鄉。

師古曰。傳讀曰附。鄉讀曰嚮。持滿言滿引弓弩。注。矢外捍也。

駿驥冠佞幸傳六十三。司馬相如傳二十七上。

孝惠時。侍中皆冠駿驥。貝帶。傅脂粉。

師古曰。以駿驥毛羽飾冠。海貝飾帶。駿驥卽鷲鳥也。音峻儀。又相如傳注云。駿驥似山雞而小。冠背毛黃。腹下赤。項綠色。其尾毛紅赤。光采鮮明。今俗呼爲山雞。其實非也。

餐霞。相如傳二十七下。

吸沆瀣兮餐朝霞。

應劭曰。列仙傳。陵陽子言。春食朝霞者。日始欲出。赤黃氣也。夏食沆瀣。北方夜半氣也。并天地玄黃之氣爲六氣。

倒景。相如傳。

貫列缺之倒景。

服虔曰。列缺。天閃也。人在天上下。向視日月。故景倒在下也。

郊祀志。登遐倒景。如淳曰。在日月之上。反從下照。故其影倒。

涓人。蒼頭軍。陳勝傳一。石奮傳十六。

陳勝旣爲其御。莊賈所殺而降秦。勝故涓人將軍呂臣爲蒼頭軍。起新陽。

應劭曰。時軍皆著青巾。故曰蒼頭軍也。師古曰。涓。潔也。涓人。主潔除之人。涓音獨。石奮爲高祖中涓。

中涓官名。主居中而涓潔者。

上游。項籍傳一。匈奴傳。

項羽陽尊懷王爲義帝。曰：古之王者，地方千里，必居上游。徙之長沙，都櫛。文穎曰：居水之上流也。師古曰：游卽流也。又匈奴傳：從上游來厭人。

拾芥。夏侯勝傳四十五。

夏侯勝每講授，常謂諸生曰：士病不明經術，經術苟明，其取青紫如俛拾地芥爾。

師古曰：地芥，謂草芥之橫在地上者，俛而拾之，言其易而必得也。青紫，卿大夫之服也。俛卽俯字也。

天極。李尋傳四十五。

李尋云：紫宮極樞，通位帝紀。

孟康曰：紫宮，天之北宮也。極，天之北極星也。樞是其迴轉者也。天文志曰：天極，其一明者，太一常居也。太一，天皇帝也。與通極爲一體，故曰通位帝紀也。

折膠。鼂錯傳。

鼂錯曰：陛下絕匈奴不與和親，臣竊意其冬來南也。欲立威者，使於折膠，來而不能困，使得氣去，後未易服也。

蘇林曰：秋氣至，膠可折，弓弩可用。匈奴常以爲候而出軍。師古曰：使得氣去者，使其得勝逞志氣而去。

賈豎。張良傳十。

張良曰。秦兵尙強。未可輕也。其將屠者子。賈豎易動以利。令持重寶啗秦將。

師古曰。商賈之人。志無遠大。譬如僮豎。故云賈豎。

長休告。丙吉傳四十四。

丙吉居相位。上寬大。椽史有罪。威不稱職。輒予長休告。

師古曰。長給休假。令其去職也。

大府。張湯傳二十九。

大府丞相府也。

方中。張湯傳。

張湯調茂陵尉。治方中。

蘇林曰。天子卽位。豫作陵。師古曰。古謂掘地爲阬曰方。今荆楚俗。土功築作。算程課者。猶以方計之。

爰書。張湯傳。

張湯劾鼠掠治。傳爰書訊鞠論報。

師古曰。傳謂傳遞。若今之追送赴對也。爰。換也。以文書代換其口辭也。訊。考問也。鞠。窮也。謂窮覈之。

也。論報。謂上論之而獲報也。

縣土炭。天文志六。李尋傳。

天文志曰。冬至短極。縣土炭。炭動。麋鹿解角。蘭根出。泉水踊。

孟康曰。先冬至三日。縣土炭於衡。兩端輕重適均。冬至而陽氣至。則炭重。夏至而陰氣至。則土重。晉灼曰。蔡邕律歷記。候鍾律。權土炭。冬至陽氣應。黃鍾通。土炭輕而衡仰。夏至陰氣應。蕤賓通。土炭重而衡低。進退先後五日之中。

李尋曰。政治感陰陽。猶鐵之低仰。見效可信者也。

孟康曰。天文志云。縣土炭也。以鐵易土耳。先冬夏至。縣鐵炭於衡各一端。令適停。冬陽氣至。炭仰而鐵低。夏陰氣至。炭低而鐵仰。以此候二至也。

景星。天文志六。

景星。德星也。其狀無常。常出於有道之國。

舞知。乾沒。張湯傳。

張湯舞知以御人。始爲小吏。乾沒。與長安富賈田甲魚翁叔之屬交私。

師古曰。舞弄其智。制御他人也。服虔曰。乾沒。射成敗也。如淳曰。豫居物以待之。得利爲乾。失利爲沒。

乾音干。

閒適。杜欽傳三十。

支庶有閒適之心。

師古曰。閒代也。音居。莧反。適讀曰嫡。

綠車。金日磾傳三十八。王莽傳六十九上。

金敞爲衛尉。病甚。上拜其子涉爲侍中。使綠車載送衛尉舍。

晉灼曰。漢注。綠車名皇孫車。太子有子。乘以從。如淳曰。常置左右以待召。載皇孫。李奇曰。欲敞見其榮寵也。

王莽得乘綠車從。

師古曰。亦以寵之也。

珠襦。霍光傳三十八。

將廢昌邑王。太后被珠襦。盛服。坐武帳中。武士陛戟。陳列殿下。

晉灼曰。貫珠以爲襦。形若今革襦矣。師古曰。陛戟。謂執戟以衛陛下。

席勝。劇通傳十五。

乘利席勝。威震天下。

師古曰。席。因也。若人之在席上。

琅當。西域傳六十六上。後漢循吏傳序注。

軍候趙德使鬪賓。與鬪賓王陰末赴相失。陰末赴鎖琅當德。殺副己下七十餘人。



師古曰。琅當。長鎖也。若今之禁繫人鎖矣。琅音郎。後漢注云。王莽一家鑄錢。保五人沒入爲官奴婢。男子檻車。女子步鐵鎖。琅當其頸。愁苦死者十七八。

橫行書。西域傳。

服虔曰。安息國橫行爲書記。師古曰。今西方胡國及南方林邑之徒。書皆橫行。不直下也。

尉薦。趙廣漢傳四十六。

趙廣漢爲二千石。以和顏接士。其尉薦待遇吏殷勤甚備。

師古曰。尉薦。謂安尉而薦達之。

童騎。張敞傳四十六。

出從童騎。

師古曰。以童奴爲騎而自從也。

便面。張敞傳。王莽傳。

張敞爲京兆尹。無威儀。時罷朝會。過走馬章臺街。使御史驅。自以便面拊馬。

師古曰。便面。所以障面。蓋扇之類也。不欲見人。以此自障面。則得其便。故曰便面。亦曰屏面。今之沙門所持竹扇。上袤平而下圓。卽古之便面也。音頻面反。

王莽常翳雲母便面。

金布令。蕭望之傳四十八。

金布令甲曰。邊郡數被兵。離飢寒。天絕天年。父子相失。令天下共給其費。

師古曰。同共給之也。自此以上。令甲之文。金布者。令篇名也。其上有府庫金錢布帛之事。因以篇名。令甲者。其篇甲乙之次。

犀利。馮奉世傳四十九。

羌戎弓矛之兵耳。器不犀利。

晉灼曰。犀。堅也。

千人司馬。馮奉世傳。

如淳曰。漢注。邊郡置都尉及千人司馬。皆不治民也。

畫象。武帝紀元光元年。

詔曰。昔在唐虞。畫象而民不犯。

應劭曰。二帝但畫衣冠異章服。而民不敢犯。師古曰。白虎通云。畫象者。畫其衣服象五刑。

度曲。元帝紀贊。

元帝多材藝。善史書。鼓琴瑟。吹洞簫。自度曲。被歌聲。

應劭曰。史書。周宣王太史籀所作大篆也。度曲。謂自隱度作新曲。因持新曲以爲歌詩聲也。荀悅曰。

被聲能播樂也。臣瓚曰：度曲謂歌終更授其次，謂之度曲。西京賦曰：度曲未終，雲起雪飛。張衡舞賦亦曰：度終復位，次受二八。度音大，各反。被音皮，義反。

甲觀畫堂。成帝紀。

孝成皇帝，元帝太子也。母王皇后，元帝在太子宫，生甲觀畫堂。

如淳曰：三輔黃圖云：太子宫有甲觀。師古曰：甲者，甲乙丙丁之次。元后傳言見於丙殿，此其例也。畫堂，但畫飾耳。霍光止畫室中，是則宮殿中通有彩畫之堂室。

祫祭。平帝紀。

元始五年，祫祭明堂。

應劭曰：禮五年而再殷祭，一禘一祫。祫祭者，毀廟與未毀廟之主，皆合食於太祖。郡將，嚴延年傳六十。

師古曰：謂郡守爲郡將者，以其兼領武事也。

股弁。嚴延年傳。

嚴延年爲涿郡太守，按大姓高氏獄，吏皆股弁。

師古曰：股戰若弁，弁謂撫手也。

縣度。西域烏秣國六十六上，西域圖志。

烏秣國其西則有縣度。去陽關五千八百八十八里。縣度者石山也。谿谷不通。以繩索相引而度。成帝時。罽賓國復遣使獻謝罪。漢欲遣使者報送其使。杜欽說大將軍王鳳曰。今縣度之阨。歷大頭痛。小頭痛之山。赤土身熱之阪。令人身熱無色。頭痛嘔吐。驢畜盡然。行者騎步相持。繩索相引。二千餘里。乃到縣度。其鄉慕不足以安西域。有求則卑辭。無欲則嬌嫚。終不可懷服也。

師古曰。縣。繩度也。縣古懸字耳。

蠖飲。西域傳。

烏秣國山居。累石爲室。民接手飲。

師古曰。自高山下谿澗中飲水。故接連其手。如蠖之爲。

馬復令。西域傳。

當今務在禁苛暴。止擅賦。力本農。修馬復令。

師古曰。馬復。因養馬以免徭賦也。復音方目反。

田輪臺渠犁。西域傳。

武帝初通西域。置校尉。屯田渠犂。是時軍旅連出。海內虛耗。弘羊等奏言。故輪臺以東。捷枝渠犂。有溉田五千頃以上。臣以爲可遣屯田卒。詣輪臺以東。置校尉三人分護。以時益種五穀。詔曰。今請遠田輪臺。起亭隧。是擾勞天下。非所以優民也。

師古曰。隱者。依深險之處。關通行道也。

饑形。王莽傳六十九上。

唯陛下饑形。虞周之盛。

子午道。王莽傳。

王莽以皇后有子孫瑞。通子午道。子午道從杜陵直絕南山。徑漢中。

張晏曰。時年十四。始有婦人之道也。子水午火也。水以天一爲牡。火以地二爲牡。故火爲水妃。今通子午以協之。師古曰。子。北方也。午。南方也。言通南北道相當。故謂之子午耳。今京城直南山有谷通梁漢道者。名子午谷。又宜州西界有山名子午嶺。計南北直相當。此則北山者是子。南山者是午。共爲子午道。

跬步。王莽傳。

進不跬步。

師古曰。半步曰跬。謂一舉足也。音空業反。

毛摯。義縱傳六十。

義縱爲定襄太守。郡中不寒而栗。縱以鷹擊爲治。

師古曰。言如鷹隼之擊。奮毛羽。執取飛鳥也。

東溼甯成傳

甯成以郎謁者事景帝。好氣。爲少吏。必陵其長吏。爲人上。操下急如東溼。

師古曰。操執持也。東溼言其急之甚也。溼物則易束。操音千高反。

曲臺記孟卿傳五十八 藝文志十

后蒼說禮數萬言。號曰后氏曲臺記。

服虔曰。在曲臺校書著記。因以爲名。師古曰。曲臺殿。在未央宮。藝文志注。如淳曰。行禮射於曲臺。后蒼爲記。故名曰曲臺記。漢官儀曰。大射于曲臺。晉灼曰。天子射宮也。西京無太學。於此行禮也。

大小戴孟卿傳

梁戴德延君。戴聖次君。德號大戴。聖號小戴。皆受經于后蒼。由是禮有大戴小戴之學。

驪駒王式傳五十八

諸博士共薦王式。詔除下爲博士。式徵來。諸大夫博士共持酒肉勞式。江公世爲魯詩宗。心嫉式。謂歌吹諸生曰。歌驪駒。式曰。聞之師。客歌驪駒。主人歌。客毋庸歸。今日諸君爲主人。日尙早。未可也。遂謝病免歸。

服虔曰。逸詩篇名也。見大戴禮。客欲去歌之。文穎曰。其辭云。驪駒在門。僕夫具存。驪駒在路。僕夫整駕也。客毋庸歸者。庸用也。主人禮未畢。且無用歸也。

鬼廷柏。東方朔傳三十五。

東方朔曰。柏者。鬼廷也。

師古曰。言鬼神尚幽闇。故以松柏之樹爲廷府也。

眞宅。楊王孫傳三十七。

楊王孫病將死。先令其子曰。吾欲羸葬。以反吾眞。且曰。死者物之歸也。精神者天之有也。形骸者地之有也。精神離形。各歸其眞。夫裹以幣帛。鬲以棺槨。支體絡束。口含玉石。欲化不得。鬱爲枯腊。千載之後。棺槨朽腐。迺得歸土。就其眞宅。遂羸葬。

歸筓。趙廣漢傳四十六。王溫舒傳六十。

趙廣漢爲潁川太守。先是潁川豪桀大姓。相與爲婚姻。吏俗朋黨。漢患之。出有案問。故漏泄其語。令相怨咎。又教吏爲歸筓。及得投書。削其主名。而託以爲豪桀大姓子弟所言。其後彊宗大族。結爲仇讐。姦黨散落。風俗大改。吏民相告。許廣漢得以爲耳目。

蘇林曰。歸音項。如餅。可受投書。孟康曰。筓。竹筓也。如今官受密事。筓也。師古曰。歸若今盛錢藏瓶。爲小孔。可入而不可出。或歸或筓。皆爲此制。而用受書。令投其中也。筓音同。王溫舒爲中尉。少年投歸。購告言姦。

負海。五行志七下之上。

秦大用民力轉輸起負海至北邊負海猶言背海也。

隼五行志。

師古曰隼鷲鳥卽今之鴉也。鴉字音胡骨反。鴉與鶻同。

方制地理志八上。

黃帝方制萬里畫壘分州得百里之國萬區方制以爲方城也。

日夜食五行志七下之下。李尋傳又注。

日夜食則無景立六尺木不見其景以此爲候。

雒陽地理志八上。

師古曰魚篆云漢火行忌水故云洛水而加佳如魚氏說則光武已後改爲雒字也。

酒泉郡地理志八下。

酒泉郡武帝太初元年開。

應劭曰其水若酒故曰酒泉。師古曰舊俗傳云城下有金泉味如酒。

古瓜州地理志。

燉煌古瓜州也地生美瓜。

師古曰卽春秋左氏傳允姓之戎居于瓜州也其地今猶出大瓜長者狐入瓜中食之首尾不出。



靈州地理志

惠帝四年置有河奇苑號非苑

師古曰苑謂馬牧也水中可居者曰洲此池在河之洲隨水高下未嘗淪沒故號曰靈州又曰河奇也二苑皆在北焉

日南部地理志

故秦象郡武帝時更名屬交州

師古曰言在日之南所謂北戶以向日者

耐刑

高祖七年令郎中有罪耐已上請之

應劭曰輕罪不至于髡完其髡髮故曰彫古從彡髮膚之意也師古曰彫當音而彫謂頰旁毛也

屬高帝紀

屬毛若今髡及髡髻之類也屬居例反髡音曷髡音瞿髡音俞說文云髡髻種綖之屬蓋方言也別注云屬織毛爲布者

略地高帝紀

凡言略地者皆謂行而取之用功力少

葭莩之故。王莽傳六十九。中山靖王傳二十三。

王莽上言曰。自諸侯王以下。至於吏民。咸知莽與陛下有葭莩。

中山靖王曰。今羣臣亦有葭莩之親。鴻毛之重。

晉灼曰。葭莩。裏之白皮也。師古曰。葭。蘆也。莩者。其筍中白皮至薄者也。葭莩喻著。鴻毛喻輕薄甚也。

前星。五行志七下之下。

大辰。心也。心爲明堂。天子之象。又星傳曰。心。大星。天王也。其前星。太子也。後星。庶子也。

河源。西域傳六十六。張騫贊三十一。

西域傳河有兩源。一出葱嶺山。一出于闐于闐在南山下。其河北流。與葱嶺河合。東注蒲昌海。蒲昌海一名蓋澤者也。去玉門陽關三百餘里。廣袤三百里。其水亭居。冬夏不增減。皆以爲潛行地下。南出於積石中國河。又張騫傳贊曰。禹本紀言河出崑崙山。高二千五百餘里。日月所相避隱爲光明也。自張騫使大夏之後。窮河源。惡睹所謂崑崙者乎。故言九州山川。尙書近之矣。至禹本紀山經所有。放哉。尙書曰。導河積石。在金城河關。不言出崑崙也。是謂河源出於積石

會稽禹穴九疑。司馬遷傳三十二。司馬相如傳注。

司馬遷自敘曰。遷年十歲。則誦古文。二十而南游江淮。上會稽。探禹穴。窺九疑。

張晏曰。禹巡狩至會稽而崩。因葬焉。上有孔穴。民間云禹入此穴。師古曰。會稽山名。本茅山也。禹於

此會諸侯之計。因名會稽也。九疑山在零陵營道縣。舜所葬也。疑似也。山有九峯。其形相似。故曰九疑。

紫貝。相如傳二十七上。

鈞紫貝。郭璞曰。紫貝。紫質黑文也。師古曰。貝水中介蟲。古以爲貨也。

珊瑚。相如傳。

郭璞曰。珊瑚。生水底石邊。大者樹高二尺餘。枝格交錯。無有葉。

家徒四壁。相如傳。

相如居成都。家徒四壁立。

師古曰。徒。空也。但有四壁。更無資產。

犢鼻。相如傳。

相如身自著犢鼻褌。

師古曰。卽今之松也。形似犢鼻。故以名云。松音之容反。

蜀徼。西南夷傳六十五。

巴蜀西南外蠻夷諸侯。秦時頗置吏焉。秦滅。漢興。皆棄此國。而關蜀故徼。

師古曰。西南之徼。猶北方塞也。徼音工。鈞反。張揖曰。徼。謂以木石水爲界者也。

請吏。一奇。相如傳二十七下。西南夷傳。

叩祚之君長。聞南夷與漢通。得賞賜多。多欲願爲內臣妾。請吏比南夷。

南夷君長以十數。夜郎最大。武帝時。唐蒙往南粵。食蜀枸醬。問之。知牂柯江出番禺城下。歸上書說上。曰。竊聞夜郎所有精兵。可得十萬。浮船牂柯。出不意。此制粵一奇也。

流離。西域傳六十六上。

流離出罽賓國。

師古曰。魏略云。大秦國出赤白黑黃青綠縹紺紅紫十種流離。

變告。韓信傳四。

師古曰。凡言變告者。謂告非常之事。

持更。西域傳。

杜欽說王鳳曰。欲遣使報送罽賓國。使斥候七百餘人。五分夜。擊刁斗自守。

師古曰。夜有五更。故分而持之。

附離。五行志七下之下。

成帝時。夜過中星隕。谷永曰。星辰附離于天。猶庶民附離王者也。王者失道。下將叛去。故星叛天而隕。以見其象。

監奴。霍光傳三十八。

霍光愛幸監奴馮子都。常與計事。

師古曰。監奴。謂奴之監知家務者也。

甲令。宣帝紀地節四年。後漢皇后后紀十上。

文穎曰。蕭何承秦法所作爲律令經是也。如淳曰。令有先後。故有令甲令乙令丙。師古曰。甲乙者。若今之第一第二篇耳。

後漢書。向使設外戚之禁。編著甲令。改正后妃之制。貽厥方來。豈不休哉。

試守。一切。平帝紀元始元年。後漢齊武王續傳注。

平帝初卽位。詔二百石以上一切滿秩如真。

師古曰。時諸官有試守者。特加非常之恩。令如真耳。非凡除吏皆當試守也。一切者。權時之事。非經常也。猶如以刀切物。苟取整齊。不顧長短縱橫。故言一切。他皆倣此。

後漢注云。試守者稱職滿歲爲真。

昆明池。武帝紀元狩三年。

發謫吏穿昆明池。

臣瓚曰。西南夷傳。有越巂昆明國。有滇池。方三百里。漢使求身毒國。而爲昆明所閉。今欲伐之。故作

昆明池。象之以習水戰。在長安西南。周回四十里。食貨志又曰。時越欲與漢用船戰。遂乃大脩昆明池也。師古曰。譏吏吏有罪者。罰而役之。滇音顛。

居延。武帝紀元狩二年。

將軍去病出北地二千餘里。過居延。

師古曰。居延。匈奴中地名也。

五屬國。武帝紀。

匈奴昆邪王殺休屠王。并將其衆。合四萬餘人來降。置五屬國以處之。以其地爲武威酒泉郡。

師古曰。昆音下門反。屠音儲。凡言屬國者。存其國號。而屬漢朝。故曰屬國。武威今涼州也。酒泉今肅州也。

詳延。武帝紀元朔五年。

詳延。天下方聞之士咸薦諸朝。

師古曰。詳。悉也。延。引也。方。道也。聞。博聞也。言悉引有道博聞之士而進於朝也。

郵時。郊祀志五上。

時音止。神靈之所止也。秦文公夢黃蛇自天下屬地。口止於郵衍。作郵時。祭白帝焉。

李奇曰。三輔謂山陵間爲時。

密時。郊祀志。

作鄜時。後八十四年。秦宣公作密時於渭南。祭青帝。

吳陽上下時。郊祀志。

自秦宣公作密時。後二百五十年。而秦靈公於吳陽作上時。祭黃帝。作下時。祭炎帝。自未作鄜時。而雍旁故有吳陽武時。雍東有好時。皆廢無祀。或曰。自古以雍州積高。神明之隩。故立時。郊上帝。諸神祠皆聚云。又作吳陽上下時。後五十年。櫟陽雨金。秦獻公自以爲得金瑞。故作畦時。櫟陽而祀白帝。

師古曰。畦時者。如種韭畦之形。而於畦中各爲一土封也。畦音下圭反。

五時。郊祀志。

諸祠唯雍四時。上帝爲尊。高祖東擊項籍而還入關。問故秦時上帝祀何帝也。對曰。四帝有白青黃赤帝之祠。高祖曰。吾聞天有五帝。而四何也。莫知其說。於是高祖曰。吾知之矣。待我而具五也。乃立黑帝祠。名曰北時。有司進祠。上不親往。至文帝始幸雍郊。見五時。趙人新垣平以望氣見上。言長安東北有神氣成五采。若人冠冕焉。宜立祠上帝以合符應。於是作渭陽五帝廟。帝一殿。面五門。各如其帝色。祠所用及儀亦如雍五時。

木寓龍馬。郊祀志。

秦祠四時。每時用木寓龍一駟。木寓車馬一駟。各如其帝色。

李奇曰。寓寄也。寄生龍形於木也。師古曰。一廟亦四龍也。

三服官。元帝紀。

元初五年。罷齊三服官。

李斐曰。齊國舊有三服之官。春獻冠幘。縱爲首服。紈素爲冬服。輕綃爲夏服。凡三。縱與纒同音。山爾反。

司馬門。元帝紀。

師古曰。司馬門者。宮之外門也。衛尉有八屯衛候。司馬主衛士。徵巡宿衛。每面各二司馬。故謂宮之外門爲司馬門。

項籍傳。留司馬門三日。

師古曰。凡言司馬門者。宮垣之內。兵衛所在。四面皆有司馬。司馬主武事。故總謂宮之外門爲司馬門。

後漢。趙王乾居父喪。白衣出司馬門。

注云。諸侯王宮門有兵衛。亦爲司馬門。

陽朔年。成帝紀。

河平四年。山陽火生石中。明年改元爲陽朔。



師古曰。朔始也。以火生石中。言陽氣之始。

微行。成帝紀。

鴻嘉元年。上始爲微行出。

張晏曰。於後門出。從期門郎及私奴客十餘人。白衣組幘。單騎出入市里。不復警蹕。若微賤之所爲。

故曰微行。

陵夷。成帝紀。

帝王之道。日以陵夷。

師古曰。陵。邱陵也。夷。平也。言其頽替若邱陵之漸平也。又曰。陵遲亦如邱陵之透遲。稍卑下也。

客土。成帝紀。

詔曰。昌陵作治五年。百姓罷勞。客土疏惡。終不可成。

服虔曰。取他處土以增高爲客土。

枌榆社。郊祀志五上。

高祖禱豐枌榆社。

鄭氏曰。枌榆。鄉名也。社在枌榆。晉灼曰。枌。白榆也。社在豐東北十五里。師古曰。以此樹爲社神。因立

名也。枌音符云反。

公社郊祀志。

高祖令縣爲公社。

李奇曰公社猶官社。

官稷成帝紀。

元始三年安漢公奏立官稷。

師古曰初立官稷於官社之後是爲一處今更創置建於別所不相從也。

樨成帝紀河平四年。

民爲水所流死不能自葬者令郡國給樨音衛葬埋。

師古曰樨音衛謂小棺。

米鹽黃霸傳五十九成宣傳。

黃霸爲潁川太守爲政米鹽靡密初若煩碎。

師古曰米鹽言雜而且細。

成宣爲左內史其治米鹽。

銀黃三組楊僕傳六十。

楊僕懷銀黃垂三組。

師古曰。銀、銀印也。黃、金印也。僕爲主爵都尉。又爲樓船將軍。并將梁侯三印。故三組也。組、綬也。郎中令。百官公卿表七上。

郎中令秦官。武帝更名光祿勳。

臣瓚曰。主郎內諸官。故曰郎中令。應劭曰。光、明也。祿、爵也。勳、功也。

中郎將。百官公卿表。

中郎有五官。左右三將。秩皆比二千石。

車戶騎三將。百官公卿表。

郎中有車戶騎三將。秩皆比千石。

如淳曰。主車曰車郎。主戶衛曰戶郎。漢儀注。左右車將主左右車郎。左右戶將主左右戶郎。

檻車。陳餘傳二。

貫高與趙王檻車詣長安。

師古曰。檻車者。車而爲檻形。謂以板四周之。無所通見。

絕亢。陳餘傳。

貫高絕亢而死。

師古曰。亢者。總謂頸耳。爾雅云。卽喉嚨也。音工郎反。

沐猴。項籍傳一。

人謂楚人沐猴而冠。

張晏曰。沐猴。獼猴也。師古曰。言雖著人衣冠。其心不類人也。

辟易。項籍傳。

楊喜爲郎騎。追項羽。羽還叱之。喜人馬俱驚。辟易數里。

師古曰。辟易。謂開張而易其本處。辟音頻亦反。

麗譙。陳勝傳一。

陳勝攻陳。戰譙門中。

師古曰。譙門。謂門上爲高樓以望耳。樓一名譙。故謂美麗之樓爲麗譙。譙亦呼爲巢。所謂巢車者。亦

於兵車之上爲樓以望敵也。譙巢聲相近。本一物也。

薺芥。相如傳二十七上。賈誼傳。

吞若雲夢者八九。其於胷中。曾不薺芥。

張揖曰。薺芥。刺鯁也。賈誼傳注。師古曰。薺芥。小鯁也。

攝弓。相如傳二十七下。

攝弓而馳。

師古曰。攝謂張弓注矢而持之也。攝女涉反。

騎置。西域傳六十六下。

事有便宜。因騎置以聞。

師古曰。騎置卽今之驛馬也。

斷匈奴左右臂。西域傳贊。後漢班超傳。

孝武之世。圖制匈奴。患其兼從西國。結黨南羌。迺表河曲列四郡。開玉門。通西域。以斷匈奴右臂。隔絕

南羌月氏。單于失援。由是遠遁。而幕南無王庭。

後漢班超曰。先帝開西域。讖者皆曰。取三十六國。號爲斷匈奴右臂。

注云。哀帝時。劉歆上議曰。武帝時立五屬國。起朔方。伐朝鮮。起玄菟。樂浪。以斷匈奴之左臂。西伐大

宛。結烏孫。裂匈奴之右臂。南面以西爲右也。

分陝。王莽傳六十九中。

王莽時分陝立二伯。

師古曰。分陝者。欲依周公。召公故事。自陝以東。周公主之。自陝以西。召公主之。

甌脫。匈奴傳六十四上。

東胡使使謂冒頓曰。匈奴所與我界。甌脫外棄地。匈奴不能至也。吾欲有之。

服虔曰。甌脫作土室。胡兒所作以候漢也。師古曰。境上候望之處。若今之伏宿舍也。甌音一侯反。脫音土活反。

威斗。王莽傳六十九下。

王莽親之南郊。鑄作威斗。威斗者。以五石銅爲之。長二尺五寸。以厭勝衆兵。既成。令司命負之。莽出在前。入在御旁。

李奇曰。以五色藥石及銅爲之。師古曰。若今作鑰石之爲。

跛行喙息。旬奴傳。

上及飛鳥跛行喙息。顛動之類。

師古曰。跛行。凡有足而行者也。喙息。凡以口出氣者也。跛音岐。喙音許穢反。顛音人竟反。豬其宮室。王莽傳六十九上。

古者畔逆之國。既已誅討。則豬其宮室。以爲汙池。納垢濁焉。名曰凶虛。雖生菜茹。而人不食。李奇曰。掘其宮以爲池。用貯水也。師古曰。豬謂畜水汙下也。汙音烏。所食之菜曰茹。

盱衡。王莽傳。

盱衡厲色。振揚武怒。

孟康曰。眉上曰衡。盱衡舉揚目也。

校司馬南粵王傳六十五。

伏波將軍路博德討南粵。而南粵王趙建德亡入海。伏波遣人追。故其校司馬蘇弘得建德。師古曰。校之司馬。若今之行軍總管司馬也。

受降城。匈奴傳。李陵傳二十四。

單于年少好斂伐。左大都尉使人閒告漢曰。我欲殺單于降漢。漢聞此言。故築受降城。李陵傳注。師古曰。受降城。公孫敖所築。





# 兩漢博聞卷第六

龍樓成帝紀十

成帝爲太子。初居桂宮。上嘗急召太子。出龍樓門。

師古曰。三輔黃圖。桂宮在城中。近北宮。非太子宮。張晏曰。樓上有銅龍。若白鶴飛廉之爲名也。

枸醬西南夷傳六十五

唐蒙使南粵。食蒙蜀枸醬。蒙問所從來。曰。道西北牂柯江。江廣數里。出番禺城下。蒙歸至長安。問蜀賈人。獨蜀出枸醬。多持竊出市。夜郎者。臨牂柯江。江廣百餘步。足以行船。南粵以財物役屬夜郎。然亦不能臣使也。

晉灼曰。枸音矩。師古曰。子形如桑椹耳。緣木而生。非樹也。味尤辛不酢。今宕渠則有之。食讀曰飲。舉白敘傳七上。

引滿舉白

師古曰。引取滿觴而飲。飲訖舉觴告白。盡不也。一說。白者。罰爵之名也。飲有不盡者。則以此爵罰之。魏文侯與大夫飲酒。令曰。不酬者浮以大白。於是公乘不仁。舉白浮君。是也。

自繆孝成趙皇后傳

鄭氏曰自縊也。師古曰繆絞也。居虬反。

戲戟。匈奴傳六十四下。

漢賜孝單于戲戟十。

師古曰戲戟有旗之戟也。戲許宜反。又音魔。

清狂。昌邑王傳三十三。

昌邑王清狂不惠。

蘇林曰凡狂者陰陽脉盡濁。今此人不狂似狂者。故言清狂也。或曰色理清徐而心不慧。曰清狂。清狂如今白癡也。

著令。吳芮傳四。

高祖封吳芮長沙王。制詔御史長沙王忠。其定著令。

鄧展曰漢約非劉氏不王。而芮王。故著令中使將王也。或曰以芮至忠。故著令也。故贊云著于甲令。而稱忠也。

支庶。吳芮傳。

孝惠高后時封吳芮庶子二人爲列侯。故贊云慶流支庶。有以矣夫。

樵蘇。韓信傳四。

樵蘇後爨。師不宿飽。

師古曰。樵取薪也。蘇取草也。小雅白華之詩云。樵彼束薪。

食采。楊雄傳五十七上。刑法志三。

楊雄。其先出自有周伯僑者。以支庶初食采於晉之楊。因氏焉。楊在河汾之間。

師古曰。采官也。以官受地。謂之采地。應劭曰。左傳云。霍楊韓魏皆姬姓也。刑法志注。師古曰。因官食地。故曰采地。

三輔號爲卿。王尊傳四十六。

如淳曰。三輔皆秩中二千石。號爲卿也。

迹射士。王尊傳。

校尉傅剛。將迹射士千人。逐捕南山羣盜。

師古曰。迹射言能尋跡而射取之也。射食亦反。

布鼓。王尊傳。

王尊曰。毋持布鼓。過雷門。

師古曰。雷門會稽城門也。有大鼓。越擊此鼓。聲聞洛陽。布鼓謂以布爲鼓。故無聲。

柱後惠文。張敞傳四十六。

應劭曰。柱後以鐵爲柱。今法冠是也。一名惠文冠。晉灼曰。漢柱法冠也。一號柱後惠文。以纒裹鐵柱。卷秦制。執法服。今御史服之。謂之獬廌。一角。今冠兩角。以獬廌爲名耳。纒卽今方目紗也。纒山爾反。卷去權反。

榜掠。孫寶傳四十七。後漢陳寵傳附。

師古曰。榜掠謂笞擊而考問之也。榜音彭。

陳寵曰。獄者急於笞格酷烈之痛。

注云。笞卽榜也。古字通用。格擊也。又陳萬年傳。下獄掠治。注云。掠擊也。力向反。

抱弩負蘭。韓延傳四十六。

如淳曰。蘭。盛弩箭箛也。師古曰。鞬鞞卽兜鞞也。蘭。盛弩矢者也。其形如木桶。鞬。丁奚反。鞞。莫侯反。

雞卜。郊祀志五下。

立粵祠而以雞卜。

李奇曰。持雞骨卜如鼠卜。

挺身逃。劉屈氂傳三十六。

師古曰。挺。引也。獨引身而逃難。

傅會。爰益贊十九。

爰盎雖不好學，亦善傅會。

張晏曰：因宜附著合會之。

衣褐。張良傳。

師古曰：褐，製若裘，今道士所服者是。

禁錢。賈捐之傳五十四下。

賈捐之曰：往者暴師，曾未一年，費四十餘萬。大司農錢盡，乃以少府禁錢續之。

師古曰：少府錢，主供天子，故曰禁錢。

浩穰。張敞傳四十六。

長安中浩穰於三輔，尤爲劇。

師古曰：浩，大也。穰，盛也。言人衆之多也。穰，人掌反。

清閒之燕。蔡義傳三十六。

蔡義上疏曰：願賜清閒之燕，得盡精思於前，上召見說詩，甚說之。

師古曰：燕，安息也。閒，讀曰閑。

扼虎。命中李陵傳二十四。

力扼虎射命中。

師古曰扼謂捉持之也命中者所指名處卽中之也。

儲倂 除舍孫寶傳四十七 後漢肅宗紀

御史大夫張忠辟孫寶爲屬欲令授子經更爲除舍設儲倂。

師古曰除爲修飾掃除也設儲倂謂豫備器物也倂文紀反。

後漢書云南巡狩詔所經道一郡縣無得設儲跽。

注云儲積也跽具也言不預有蓄備。

擿舛 孫寶傳

傅太后怒曰帝置司隸使擿舛以揚我惡我當坐之。

師古曰擿舛謂挑發之擿他歷反舛音決。

以日易月文帝紀後六年

文帝遺詔曰服大紅十五日小紅十四日織七日釋服。

服虔曰皆當言大功小功布也織細布衣也應劭曰紅者中祥大祥以爲領緣織者禫也凡三十六

日而釋服矣此以日易月也晉灼曰漢書例以紅爲功也師古曰紅與功同服晉二說是也此喪制

者文帝自率己意創而爲之非有取於周禮也何爲以日易月乎三年之喪其實二十七月豈有三

十六月之文禫又無七月也應氏旣失之於前而近代學者因循謬說未之思也。

檉柳胡桐白草。西域傳六十六上。

樓蘭國出玉多葭葦檉柳胡桐白草。

注云孟康曰白草草之白者胡桐似桑而多曲師古曰檉柳河柳也今謂之赤檉白草似莠而細無芒其乾熟時正白色牛馬所嗜也胡桐亦似桐不類桑也蟲食其樹而沫出下流者俗名爲胡桐淚言似眼淚也可以汗金銀工匠用之流俗語訛呼淚爲律檉丑成反。

臧緹食貨志四下。

萬室之邑必有萬鍾之臧臧緹千萬千室之邑必有千鍾之臧臧緹百萬春以奉耕夏以奉耘耒耜器械種饑糧食必有取澹焉故大賈畜家不得豪奪吾民矣。

孟康曰六斛四斗爲鍾緹錢貫也饑與餉同謂餉田之具也。

都護督察西域傳。

日逐王畔單于將衆來降護鄯善以西使者鄭吉迎之既至漢封日逐王爲歸德侯吉爲安遠侯因使吉并護北道故號曰都護都護之起自吉置矣都護督察烏孫康居諸外國。

師古曰都猶總也言總護南北之道督察也。

單于文帝紀匈奴傳六十四上。

單于者廣大之貌也言其象天單于然也。

師古曰。單于。匈奴天子之號。單音蟬。

突門。後漢竇融傳附。

注云。突門。守城之門。墨子曰。城百步爲一突門也。

日者。高帝紀。

師古曰。日者。猶往日也。

倒縣。賈誼傳十八。

賈誼曰。天下之執方倒縣。凡天子者。天下之首。何也。上也。蠻夷者。天下之足。何也。下也。今匈奴嫚侮。掠至不敬也。而漢歲致金絮采繒以奉之。夷狄徵令。是主上之操也。天子供貢。是臣下之禮也。足反居上。首顧居下。倒縣如此。莫之能解。猶爲國有人乎。

碑碣。後漢竇憲傳附。

封神邱兮建隆碣。

注云。神邱。卽燕然山也。方者謂之碑。圓者謂之碣。碣亦碣也。其例反。

駝。項籍傳一。

羽駿馬名。

師古曰。蒼白雜毛曰駝。蓋以其色名之。



贈行段會宗傳四十。

朋友以言贈行。

師古曰贈行謂將別相贈也。

炳管蕭禮樂志三。郊祀歌。

李奇曰管腸閒脂也。蕭香蒿也。師古曰以蕭炳脂合馨香也。管來彫反。炳人說反。

柘漿禮樂志樂府歌。

秦尊柘漿析朝醒。

應劭曰柘漿取其柘汁以爲飲也。醒病酒也。析解也。

贅壻賈誼傳十八。

秦人家富子壯則出分。家貧子壯則出贅。

應劭曰出則贅壻也。師古曰謂之贅壻者言其不當出妻家亦猶人身之有疣贅非應所有也。贅之

銳反。分扶問反。

隊帥爰盎傳十九。

如淳曰隊帥軍中小官。

請室賈誼傳爰盎傳。

賈誼曰。大臣有鼻。白冠。鵲纓。盤水加劍。造請室而請辜耳。

應劭曰。請辜之室。蘇林曰。車駕出。有請室。令在前先驅。此官有別獄也。如淳曰。水性平。若已有正罪。君以平法治之也。加劍。當以自刎也。或曰。殺牲者以盤水取頸血。故示若此也。

爰盎傳云。人上書告絳侯反。時絳侯已就國。徵繫請室。

師古曰。請室。獄也。

兩宮。王莽傳六十九上。

師古曰。兩宮。謂成帝及太后也。

祖有功。景帝紀。

詔曰。古者祖有功而宗有德。

師古曰。祖。始也。始受命也。宗。尊也。有德可尊。

天郊。成帝紀。建始二年。

應劭曰。天郊。在長安城南。地郊。在長安城北。

款塞。宣帝紀。本始二年。

百蠻鄉風。款塞來享。

應劭曰。款。叩也。皆叩塞門來服從也。

什器。平帝紀。

師古曰。軍法。五人爲伍。二伍爲什。則共其器物。故通謂生生之具爲什器。亦猶今之從軍及作役者。十人爲火。共畜調度也。

除保父母同產令。元帝紀。

初元五年。詔除光祿大夫已下至郎中保父母同產之令。

應劭曰。舊時相保。一人有過。皆當坐之。師古曰。特爲郎中已上除此。今者所以優之也。同產謂兄弟也。

給事宮司馬中。元帝紀。

元帝詔。今從官給事宮司馬中者。得爲大父母。父母兄弟通籍。

應劭曰。司馬中者。宮內門也。司馬主武。兵禁之意也。籍者。爲二尺竹牒。記其年紀名字物色。縣之宮門。案省相應。乃得入也。師古曰。從官親近天子常侍從者。皆是也。

四輔。谷永傳五十五。

師古曰。四輔謂左輔、右弼、前疑、後丞也。

警說。谷永傳。

聽陔昧之警說。

師古曰：警說言不中道若無目之人也。唵與暗同。

小學。杜鄴傳五十五。

杜鄴初從張吉學。吉子竦。又幼孤。從鄴學問。亦著於世。尤長小學。鄴子林。清靜好古。亦有雅才。其正文字過於鄴。竦。故世言小學者由杜公。

師古曰：小學謂文字之學也。周禮八歲入小學。保氏教國子以六書。故因名云。藝文志載小學十家三十五篇。

首歲。蕭望之傳四十八。

師古曰：首歲歲之初。首謂正月也。

下走。蕭望之傳。

應劭曰：下走僕也。師古曰：下走者自謙言趨走之役也。又司馬遷報任少卿書曰：太史公牛馬走。注云：言已爲太史公掌牛馬之僕。自謙之辭也。出文選。

望舒。楊雄傳五十七。

望舒彌轡。

師古曰：望舒月御也。彌斂也。言天子之車斂轡徐行。故假望舒爲言耳。

結轍。文帝紀後二年。

使者冠蓋相望，結轍於道。

韋昭曰：使車往還，故轍如結也。

膠葛。

解難云：獨不見夫翠蚪絳螭之將登虛天，不階浮雲，翼疾風，虛舉而上升，則不能撒膠葛，騰九閔。

師古曰：撒，揭也。膠葛，上清之氣也。九閔，九天之門。撒音戟，揭居足反。

又甘泉賦：齊捧捧其相膠葛兮。

獫狁人。楊雄傳。

獫狁人亡，則匠石輟斤，而不敢妄斲。

服虔曰：獫狁，古之善塗墍者也。施廣領大袖以仰塗，而領袖不汗，有小飛泥，誤著鼻，因令匠石揮斤而斲之。知石之善斲，故敢使之也。師古曰：獫，杖拭也。故謂塗者爲獫狁，乃高反。

琴徽。楊雄傳。

師古曰：徽，琴徽也。所以表發撫抑之處也。

三宮。王嘉傳五十六。

師古曰：三宮，天子、太后、皇后也。

### 立樂府。

武帝定郊祀之禮。祠太一於甘泉。祭后土於汾陰。乃立樂府。采詩夜誦。以李延年爲協律都尉。多舉司馬相如等數十人。造爲詩賦。略論律呂。以合八章之調。作十九章之歌。以正月上辛用事甘泉圓邱。使童男女七十人俱歌。昏祠至明。夜常有神光如流星。止集于祠壇。天子自竹宮而望拜。

師古曰。樂府之名。蓋起於此。韋昭曰。竹宮以竹爲宮也。師古曰。采詩夜誦者。其言辭或祕不可宣露。故於夜中歌誦也。

百賈。王嘉傳。

師古曰。賈謂販賣之人也。

案脉。王嘉傳。

師古曰。案脉爲切脉也。

厭衆意。王莽傳。

莽欲厭衆意。

師古曰。厭。滿也。一豔反。

雅拜。何武傳五十六。

何武爲京兆尹。坐舉方正。所舉者召見。槃辟雅拜。有司以爲詭衆虛僞。武坐左遷楚內史。

服虔曰：行禮容拜也。師古曰：槃辟，猶槃旋也。辟音闕，詭，遠也。

昆雞。司馬相如傳二十七上。

張揖曰：昆雞似鶴，黃白色。

靈鼈。相如傳。

樹靈鼈之鼓。

師古曰：以鼈皮爲鼓。

釋蹠。王褒傳三十四下。

離疏釋蹠而享膏粱。

應劭曰：離此蔬食。釋此木蹠也。師古曰：蹠，卽鞋也。居略反。史記：虞卿躡蹠擔簦。說趙注云：蹠，草履也。

褒成君。孔光傳五十一。

孔霸以選授太子經。元帝卽位，徵霸以師，賜爵關內侯，食邑八百戶，號褒成君。

如淳曰：爲帝師，教令成就，故曰褒成君。

尺二牘。匈奴傳六十四上。

漢遣單于書，以尺一牘，中行說令單于以尺二寸牘，及印封，皆令廣長大，倨驚其辭，以答漢。漢遣中行說使匈奴，而說不欲行，漢強使之，說遂降匈奴不歸。

高嘗貨殖傳六十一。

丹、王君房、鼓、樊少翁、王孫大卿爲天下高嘗。

師古曰：王君房、賣丹、樊少翁及王孫大卿、賣鼓，亦致高嘗。嘗讀與資同。

力政游俠傳六十二。五行志七中之下。

戰國合從連衡力政爭疆。

師古曰：力政者，棄背禮義，專任威力也。

天子微弱，諸侯力政。

師古曰：政亦征也。言專以武力相征討。

醢。郭解傳六十二。

郭解姊子負解之勢，與人飲，使之醢，非其任，彊灌之，人怒，刺殺解姊子。

師古曰：盡爵曰醢。其人不飲而使盡爵，乃強灌之，故怨怒也。醢，子笑反。

內朝外朝。劉輔傳四十七。

劉輔上書直諫，收繫庭祕獄。於是中朝左將軍辛慶忌、右將軍廉褒、光祿勳師丹、太中大夫谷永俱上

書諫，得減死罪一等。

孟康曰：中朝，內朝也。大司馬、左右前後將軍、侍中、常侍、散騎諸吏爲中朝。丞相以下至六百石爲外



朝也。

傳漏。董賢傳六十三。

董賢傳漏在殿下。

師古曰。傳漏。奏時刻也。

梁肉。霍去病傳二十五。食貨志四上。

師古曰。梁。粟類也。米之善者。食貨志曰。梁。好粟也。卽今之梁米也。

特將。去病傳。張良傳十。

衛青家爲特將者十五人。

師古曰。特將。謂獨別爲將而出征也。

高帝時。魏王豹反。使韓信特將北擊之。

師古曰。特。獨也。專任之使將也。

渾殺。董仲舒傳二十六。

賢不肖渾殺。

注云。殺。雜也。

邊殺。劉屈氂傳三十六。

如淳曰。戍邊卒糧也。

車丞相。車千秋傳三十六。

秋本姓田氏。爲丞相年老。上優之。朝見得乘小車入宮殿。因號曰車丞相。

譙讓。高帝紀。

樊噲譙讓項羽。

師古曰。譙。責也。才笑反。

月蝓日域。楊雄傳五十七下。

長楊賦。西厭月蝓。東震日域。

服虔曰。蝓。音窟。穴之窟。月蝓。月所生也。師古曰。日域。日初出之處也。

廉問。高帝紀五年。

高帝詔曰。且廉問。有不如吾詔者。以重論之。

師古曰。廉。察也。

詔。高帝紀。

如淳曰。詔。告也。自秦漢以下。唯天子獨稱之。

梟騎。高帝紀。

項羽未平北貉燕人來致梟騎助漢

應劭曰北貉國也梟健也張晏曰梟勇也若六博之梟也師古曰貉在東北方三韓之屬皆貉類也莫客反

兜離後漢董祀妻傳附

言兜離兮狀窈婷

注云兜離匈奴言語之貌

二斬後漢曹世叔妻傳附

禮夫有再娶之義婦無二適之文故曰夫者天也

注云儀禮曰父在爲母何以甚至尊在不敢伸也父必三年而後娶達子志也夫者妻之天也婦人  
不二斬者猶曰不二天也

比落蒙全後漢姜詩傳附

姜詩至孝赤眉賊經詩里弛兵而過曰驚大孝必觸鬼神時歲荒賊乃遺詩米肉受而埋之比落蒙其  
安全

注云比近也落藩也

楚歌高帝紀

漢圍項羽於垓下。羽夜聞漢軍四面皆楚歌。知盡得楚地。

應劭曰：楚歌者，雞鳴歌也。漢已略得其地，故楚歌者多雞鳴時歌也。師古曰：楚歌者爲楚人之歌，猶言吳歛越吟耳。若以雞鳴爲歌曲之名，於理則可不得云雞鳴時也。高祖令戚夫人楚舞，自爲作楚歌，豈亦雞鳴時乎？

顧山錢 平帝紀元始元年

平帝詔：天下女徒已論歸家，顧山錢月三百。

如淳曰：已論者，罪已定也。令甲女子犯罪，作如徒。六月，顧山遣歸。一說以爲當於山伐木，聽使入錢。顧工直，故謂之顧山。應劭曰：舊刑，鬼薪，取薪於山，以給宗廟。今使女徒出錢顧薪，故曰顧山也。師古曰：如說近之。論，女徒論罪已定，並放歸家，不親役之，但令一月出錢三百以顧人也。爲此恩者，所以行太后之德，施惠政於婦人。

體貌大臣 賈誼傳十八

體貌大臣而厲其節也。

師古曰：體貌，謂加禮谷而敬之也。

官師 賈誼傳

官師小吏

師古曰。官師。一官之長也。

粟紅腐。賈捐之傳三十四下。

太倉之粟。紅腐而不可食。

師古曰。粟久腐壞。則色紅赤也。

上東門。賈誼傳。

雒陽上東門。

師古曰。東面最北門。曰上東門。

跡前事。賈誼傳。

臣竊跡前事。

師古曰。尋前事之蹤跡也。

無狀子。杜欽傳三十。

紅陽侯與杜業書曰。誠哀老姊垂白。隨然狀子出關。

師古曰。無狀。猶言不肖也。

排擠。杜欽傳。

排擠英俊。

師古曰。儕、墜也。

囊佗。匈奴傳六十四上。

師古曰。囊佗。言能負囊囊而馱物也。

刑名。元帝紀。

宣帝所用多文法吏。以刑名繩下。

師古曰。劉向別錄云。申子學號刑名。刑名者。以名責實。尊君卑臣。崇上抑下。宣帝好觀其君臣箝繩。謂彈治之耳。

戚里。萬石君傳十六。

師古曰。於上有姻戚者皆居之。故名其里爲戚里。

廷見。萬石君傳。

石建奏事於上前。卽有可言。屏人乃言。極切至。廷見。如不能言者。

師古曰。廷見。謂當朝而見時。

議格。文三王傳十七。

大臣及爰盎等有所關說於帝。太后議格。

蘇林曰。音闕。

魁岸江充傳十五。

爲人魁岸。

師古曰魁大也岸者有廉棱如崖岸之形。

微諫伍被傳十五。

師古曰私諫之也。

假吏蘇武傳二十四。

蘇武使匈奴有假吏常惠等。

師古曰假吏猶言兼吏也時權爲使之吏若今差人充使典矣。

官吏外戚傳六十七下。

師古曰官吏謂奄人也。

循江上西南夷傳六十五。

將兵循江上。

師古曰循順也謂緣江而上也。





# 兩漢博聞卷第七

阿房賈山傳。

秦爲阿房之殿。

師古曰。阿房者。言殿之四阿皆爲房也。一說。大陵曰阿。言其殿高。若於阿上爲房也。  
章帶賈山傳。

布衣章帶之士。

師古曰。章帶。以單韋爲帶。無飾也。

弧弓韓安國傳二十二。

弧弓射獵。

師古曰。以木曰弧。以角曰弓。

魯縞韓安國傳。

彊弩之末。力不能入魯縞。

師古曰。縞。素也。曲阜之地。俗善作之。尤爲輕細。故以取喻也。

劇上賈山傳贊二十一。

賈山自下劓上卒免刑戮者以其言正也。

孟康曰劓上者謂剗切之也。蘇林曰劓音摩厲也。師古曰剗工來反。

齧郟。王褒傳三十四下。

孟康曰良馬低頭口至郟故曰齧郟。

么麼。敘傳七上。

勇如信布。彊如項籍。威如王莽。然卒潤鑊伏鎗。亨醢分裂。又況么麼尙不及數子。師古曰么麼皆微之稱也。么一堯反。麼莫可反。

北叟。

北叟頗識其倚伏。

丹青之信。王莽傳。

明告以生活丹青之信。

師古曰生活謂來降者不殺之也。丹青之信言明著也。

渾元。敘傳。

渾元運物。

師古曰渾元天地之氣也。

椒除王莽傳。

羣臣扶掖王莽自前殿南下椒除。

服虔曰除殿陛之道也。椒取芬香之名也。

秦中婁敬傳。

師古曰秦中謂關中故秦地也。

東箱周昌傳十二。

呂后側耳於東箱聽。

師古曰正寢之東西室皆曰箱言似箱篋之形。

大奴昌邑哀王傳。

師古曰凡言大奴者謂奴之尤長大者也。

南北軍七校刑法志三。

漢初天下既定踵秦置材官於郡國京師有南北軍之屯至武帝平百粵內增七校外有樓船皆歲時

講肄脩武備云。

晉灼曰百官表中壘屯騎步兵越騎長水胡騎射聲虎賁凡八校尉胡騎不常置故此言七也。

飲滄買捐之傳三十四下。

飲泣巷哭。

師古曰：淚流被面，以入於口，故言飲泣也。

提封。東方朔傳三十五。

盤屋以東，宜春以西，提封頃畝，及其賈直。

師古曰：提封，謂提舉四封之內，總計其數也。

桓褐。賈禹傳四十二。

桓褐不完。

師古曰：桓者，謂僮豎所著布長襦也。褐，毛布之衣也。桓音豎。

顓門。夏侯勝傳四十五。

夏侯建者，勝之從父子也。師事勝，勝非建章句小儒，破碎大道，建亦非勝爲學疏略，難以應敵。建卒自

顓門。

社木。陸弘傳四十五。

師古曰：社木，社主之樹也。

菜色。翼奉傳四十五。

百姓菜色。

師古曰。人專食菜。故肌膚青黃。爲菜色也。

伏歷。李尋傳四十五。

馬不伏歷。不可以趨道。

師古曰。伏歷。謂伏槽歷而秣之也。

壺輿。敘傳七。

究先聖之壺輿。

應劭曰。宮中門謂之闈。宮中巷謂之壺。苦本反。

牛衣。王章傳四十六。

師古曰。牛衣。編亂麻爲之。卽今俗呼爲龍具者。

蹂躪。王商傳。

百姓奔走相蹂躪。訛言大水至也。

師古曰。蹂。踐也。躪。轢也。蹂人九反。躪音蘭。

文母害。蕭何傳九。

蕭何以文母害。爲沛主吏掾。

蘇林曰。無害言無比也。一曰。害。勝也。無能勝害之者。晉灼曰。酷吏傳。趙禹爲丞相亞夫吏。府中皆稱

其廉然亞夫不任曰極知禹無害然文深不可以居大府蘇說是也師古曰害傷也無人能傷害之者蘇晉兩說皆得其意

豪吏曹參傳九

蕭何曹參並爲縣之豪吏

師古曰言爲吏之豪長也

梟首高帝紀四年

漢王西入關梟故塞王欣頭櫟陽市

師古曰梟縣首於木上

啗秦將高帝紀秦三年

漢王使酈食其陸賈往說秦將啗以利秦將果欲連和

師古曰啗者以食餒人令其啗食徒濫反今言以利誘之取食爲譬

甚亡謂也高帝紀

師古曰亡謂者失於事宜不可以訓

七大夫高帝紀

高帝詔曰七大夫以上皆令食邑

臣瓚曰。秦制。列侯乃得食邑。今七大夫以上皆食邑。所以寵之也。師古曰。七大夫。公大夫也。爵第七。故謂之七大夫。

省中。昭帝紀。

昭帝八歲卽位。帝姊鄂邑公主。益湯沐邑。爲長公主。共養省中。

師古曰。以供養天子。故益邑也。伏儼曰。蔡邕云。本爲禁中。門閣有禁。非侍御之臣不得妄入行道。豹

尾中亦爲禁中。孝元皇后父名禁。避之。故曰省中。師古曰。省。察也。言入此中。皆當察視。不可妄也。

海丞。果丞。平帝紀。

元始元年。置少府海丞。果丞各一人。

師古曰。海丞。主海稅。果丞。掌諸果實也。

軫獵車。宣帝紀。

霍光廢昌邑王。太僕以軫獵車奉迎曾孫。是爲宣帝。嗣昭帝後。

文穎曰。軫獵。小車。前有曲輿。不衣也。近世謂之軫獵車。李奇曰。蘭輿。輕車也。是時未備。天子車駕。故

且取其輕便爾。

疇其爵邑。宣帝紀地節二年。

霍光薨。詔曰。大將軍功德茂盛。朕甚嘉之。復其後世。疇其爵邑。世世毋有所與。

張晏曰律非始封十減二疇者等也言不復減也師古曰與讀曰豫

年號武帝紀

武帝卽位年號建元元年

師古曰自古帝王未有年號始起於此

大要陳萬年傳三十六

陳咸謂其父曰具曉所言大要教咸調也

師古曰大要大歸也

射聲百官公卿表七上

射聲校尉掌待詔射聲士

服虔曰工射者也冥冥中聞聲則中之因以名也應劭曰須詔所命而射故曰待詔射也

大長秋百官公卿表

師古曰秋者秋成之時長者恆久之義故以爲皇后官名景帝時置皇后卿也

長信少府百官公卿表

長信詹事掌皇太后宮景帝更名長信少府

張晏曰以太后所居宮爲名也居長信宮則曰長信少府居長樂宮則曰長樂少府也



塊然。陳湯傳四十。

師古曰。塊然。獨處之意。如土塊也。

廉上。趙充國傳三十九。

辛武賢擊罕羌。入鮮水北。句廉上。

服虔曰。句音鉤。師古曰。句廉。謂水岸曲而有廉稜也。

倅馬。趙充國傳。

趙充國上屯田奏曰。至四月草生。發郡騎及屬國胡騎。伉健各千倅。馬什二。就草爲田者遊兵。

師古曰。倅。副也。什二者。千騎則與副馬二百匹也。伉。口浪反。

薦草。趙充國傳。

今虜亡其美地。薦草。

師古曰。薦。稠草也。

刺舟。王莽傳六十九下。

師古曰。檝。所以刺舟也。

班輸。敘傳七上。

班輸。摧巧於斧斤。

師古曰。班輸。卽魯公輸班也。一說班魯班也。與公輸氏爲二人也。皆有巧藝也。故樂府云。誰能爲此器。公輸與魯班。搯專也。一曰競也。搯音角。

鷓鴣雀。黃霸傳五十九。

京兆尹張敞舍鷓鴣雀飛集丞相府。

師古曰。此鷓鴣音芬。本作鴝。此通用耳。鴝雀大而色青。出羌中。非武賁所著。武賁鷓者色黑。出上黨。以其鬪死不止。故用其尾飾武臣首云。今時俗人所謂鷓鴣雞者也。音曷。非此鷓鴣雀也。

胥靡。楚元王傳六。

楚王戊淫暴。申公、白生二人諫不聽。胥靡之。

晉灼曰。胥相也。靡隨也。師古曰。聯繫使相隨而服役之。故謂之胥靡。猶今之役囚徒。以鎖聯繫耳。部署。高帝紀。

漢王引兵東定三秦。部署諸將。

師古曰。分部而署置。

屬吏。昌邑哀王傳三十三。

昌邑王賀徵入嗣位。過弘農。使大奴善以衣車載女子。至湖。郎中令龔遂入問賀。賀曰。無有。遂曰。卽無有。何愛一善。以毀行義。請收以滿灑大王。卽梓善屬衛士長行法。

師古曰。以善付吏也。屬之欲反。湍。澣也。灑。濯也。湍。子顛反。灑。先禮反。拑。持頭也。衛士長主衛之官。拑才兀反。

博望苑。武五子傳三十三。

武帝爲戾太子立博望苑。使通賓客。

師古曰。取其廣博觀望也。

禱祝。武五子傳。

武帝年二十九。乃得太子。甚喜。爲立禱。使東方朔。枚皋作禱祝。

師古曰。禱。求子之神也。禮。月令。祀于高禱是也。令朔等作祝禱之辭。

少府私府。路溫舒傳二十二。

路溫舒遷廣陽私府長。

師古曰。藏錢之府。天子曰少府。諸侯曰私府。長者其官之長也。

厄三七之間。路溫舒傳。谷永傳五十五。

路溫舒從祖父受歷數天文。以爲漢厄三七之間。

張晏曰。三七。二百一十歲也。自漢初至哀帝元年。二百一十一年也。至平帝崩。二百一十一年。

成帝時。谷永曰。陛下承八世之功業。當陽數之標季。涉三七之節紀。直百六之災厄。

孟康曰。陽九之末季也。至平帝乃三七二百一十歲之厄。今已涉向其節紀。師古曰。直當也。

土著。張騫傳三十三。

身毒國在大夏東南。可數千里。其俗土著。

鄧展曰。毒音篤。李奇曰。一名天篤。卽浮屠胡是也。師古曰。卽敬佛道者也。土著者。謂有城郭常居。不

隨畜牧移徙也。著。直略反。西南夷傳。身毒國卽天竺國也。

不得月支要領。張騫傳。

張騫至大月支。留歲餘還。不得月支要領。

師古曰。要。衣要也。領。衣領也。凡持衣者。執要與領。言騫不得月支意趣。無以持歸漢。故以爲喻。要一

遙反。

先容。鄒陽傳二十一。

蟠木根柢。輪囷離奇。而爲萬乘器者。以左右先爲之容也。

師古曰。蟠木。屈曲之木也。萬乘器者。天子車輿之屬也。容。謂彫刻加飾。

七首。鄒陽傳。

七首竊發。

師古曰。七首。短劔也。其首類七。便於用也。

寥廓之士鄒陽傳。

師古曰。寥廓。遠大之度也。

糲食司馬遷傳。

糲梁之食。

服虔曰。糲。粗米也。一斛粟七斗米爲糲。音賴。師古曰。食。飯也。

杜陵男子蕭育傳四十八。後漢楊彪傳四十四。

蕭育爲茂陵令。扶風怒曰。召諸後曹。當以職事對。育徑出。曹佐隨奉育。青案佩刀曰。蕭育杜陵男子。何詣曹也。

如淳曰。賊曹。法曹。皆後曹也。師古曰。欲以職事責之也。自言欲免官而去。但是杜陵一白衣男子耳。何須召我詣曹乎。

後漢曹操欲殺楊彪。孔融謂操曰。今橫殺無辜。海內觀聽。誰不解體。孔融魯國男子。明日便當拂衣而去。

押至息夫躬傳十五。

軍書交馳而輻湊。羽檄重迹而押至。

師古曰。押至。言相因而至也。

侵牟。李廣利傳三十一。

將吏侵牟之。

師古曰。侵牟。言如牟賊之食苗也。

質木。地理志八下。

民俗質。

師古曰。質木者。無有文飾。如木石然。

虎牢。地理志八上。

成皋。注云。故虎牢。或曰制。師古曰。穆天子傳云。七萃之士生捕獸。卽獻天子。天子畜之。東號。號曰獸牢。

句吳。于越。地理志八下。

師古曰。句音鉤。夷俗語之發聲也。亦猶越爲于越耳。

勃碣。地理志武帝紀元封元年注。

勃碣之閒。一都會也。

師古曰。勃。縣。燕之所都也。勃。勃海也。碣。碣石也。此石著海旁。碣碣然特立之貌也。

三楚。高帝紀。

項羽自立爲西楚霸王。

孟康曰。舊名江陵爲南楚。吳爲東楚。彭城爲西楚。

罽毼文帝紀七年。

未央宮東闕罽毼災。

如淳曰。東闕與其兩旁罽毼皆災也。晉灼曰。東闕之罽毼獨災也。師古曰。罽毼謂連闕曲閣也。以覆

重刻垣墉之處。其形罽毼然。一曰屏也。罽音浮。五行志注云。罽毼闕之屏也。

卽拜。趙充國傳三十九。

上迺拜樂成侯許延壽爲強弩將軍。卽拜酒泉太守武賢爲破羌將軍。

師古曰。卽就也。就其郡而拜之。

三始。鮑宣傳四十二。

如淳曰。正月一日爲歲之朝。月之朝。日之朝。始由朝也。

蕭然。食貨志四下。

江淮之間。蕭然煩費矣。

師古曰。蕭然猶騷然。勞動之貌。

子母錢。食貨志。

周景王時，患錢輕，更鑄大錢。單穆公曰：不可。古者量資幣，權輕重以救民。民患輕，則爲之作重幣以行之。於是有母權子而行，民皆得焉。若不堪重，則多作輕而行之，亦不廢重。於是有子權母而行，小大利之。今王廢輕而作重，民失其資，能無匱乎？

應劭曰：母重也，其大倍，故爲母也。子輕也，其輕少半，故爲子也。民患幣之輕而物貴，爲重幣以平之。權時而行，以廢其輕，故曰母權子。猶言重權輕也。民皆得者，本末有無，皆得其利也。孟康曰：重爲母，輕爲子。若市八十錢物，以母當五十，以子當三十，續之。民患幣重，則多作輕錢而行之，亦不廢去重者。言重者行其貴，輕者行其賤也。

腹非。食貨志。

張湯奏當異九卿，見令不便，不入言而腹非。論死，自是後有腹非之法比。

師古曰：比，則例也。

姦鑄。赤仄。食貨志。

郡國鑄錢，民多姦鑄，錢多輕，而公卿請令京師鑄官赤仄，一當五。賦官用，非赤仄不得行。

師古曰：姦鑄，謂巧鑄之雜鉛錫。應劭曰：赤仄，謂子紺錢也。如淳曰：以赤銅爲其郭也。今錢郭見有赤者，不知作法云何。師古曰：凡充賦及給官用，皆令以赤仄。

莢錢。食貨志。



漢興以爲秦錢重難用更令民鑄莢錢。

如淳曰如榆莢也。

八銖錢高后紀

高后二年行八銖錢。

應劭曰本秦錢質如周錢文曰半兩重如其文卽八銖也漢以其太重更鑄莢錢今民間名榆莢錢是也民患其太輕至此復行八銖錢。

五分錢高后紀

高后六年行五分錢。

應劭曰所謂莢錢者。

四銖錢文帝紀五年 食貨志

孝文時以錢益多而輕乃更鑄四銖錢其文爲半兩除盜鑄錢令使民放鑄。

師古曰恣其私鑄也。

賈誼諫曰令細民人操造幣之執各隱屏而鑄作姦錢日多其爲禍博矣。

五銖錢武帝紀 食貨志

武帝元狩五年罷半兩錢行五銖錢。

食貨志元狩五年三官初鑄五銖錢三官謂上林三官也。

契刀錯刀食貨志

王莽居攝變漢制以周錢有母子相權於是更造大錢徑寸二分重十二銖文曰大錢五十又造契刀錯刀契刀其環如大錢身形如刀長二寸文曰契刀五百錯刀以黃金錯其文曰一刀直五千與五銖錢凡四品並行。

張晏曰案今所見契刀錯刀形質如大錢而肉好輪厚異於此大錢形如大刀環矣契刀身形負不長二寸也其文左曰契右曰刀無五百字也錯刀則刻之作字也以黃金填其文上曰一下曰刀二刀泉甚不與志相應也以扎單差錯文字磨滅故耳師古曰王莽錢刀今並尙在形質及文與志相合無差錯。

連弩李陵傳

李陵發連弩射單于。

張晏曰三十索共一臂也索去權反。

便衣李陵傳

師古曰謂著短衣小褻也。

一半冰李陵傳

李陵令軍士人持二升糒。一半冰。

師古曰。半讀曰判。判。判大片也。時冬寒有冰。持之以備渴也。

百金稅。朱建傳十三。

朱建母死。辟陽侯奉百金稅。

師古曰。贈終者之衣被曰稅。言以百金爲衣被之具。稅式芮反。其字從衣。

問遺。婁敬傳十三。

師古曰。問遺謂餉饋之也。

舍匿。淮南厲王傳十四。

舍匿者。論皆有法。

師古曰。舍匿。謂容止而藏隱也。

發車封。淮南厲王傳。

不敢發車封。淮南厲王謀逆。赦死罪。載以輜車。令縣次傳。王不食而死。縣傳者不敢發車封。

孟康曰。檻車有封。

友壻。嚴助傳三十四上。

嚴助對武帝曰。臣家貧。爲友壻富人所辱。

師古曰。友壻。同門之壻也。

搏景。主父偃傳三十四。

匈奴獸聚而鳥散。從之如搏景。

師古曰。搏擊也。搏人之陰景。言不可得也。

刷恥。貨殖傳六十一。

報彊吳。刷會稽之恥。

師古曰。刷。謂拭除之也。

埒富。猶頓傳。

與王者埒富。

師古曰。埒。等也。

稱之不容口。爰盎傳十九。

師古曰。稱美其德。口不能容也。

法宮。見錯傳。

五帝神聖。處法宮之中。明堂之上。

如淳曰。法宮。路寢正殿也。

充賦。晁錯傳。

晁錯曰。以臣充賦。甚不稱明詔求賢之意。

如淳曰。猶言備數也。臣瓚曰。充賦。此錯之謙也。云如賦調也。

狐白。匡衡傳五十一。

夫富貴在身。而烈士不譽。是有狐白之裘。而反衣之也。

師古曰。狐白。謂狐掖下之皮。其毛純白。集以爲裘。輕柔難得。故貴也。反衣之者。以其毛在內也。今人則以背毛爲裘。而棄其白。蓋取厚而溫也。衣於旣反。

隨牒。匡衡傳。

匡衡材智有餘。經學絕倫。但以無階朝廷。故隨牒在遠方。

師古曰。階。謂升次也。隨牒。謂隨選補之常牒。不被超擢者。

已然諾。灌夫傳二十二。

灌夫不好文學。喜任俠。已然諾。

師古曰。已。必也。謂一言許人。必信之也。

餐錢奉邑。高后紀二年。

列侯幸得賜餐錢奉邑。

章昭曰。稅租奉祿。正所食也。四時得閒賜。是爲餐錢。餐。小食也。師古曰。餐。飧同一字耳。于安反。飧。所謂吞食物也。餐。錢。賜廚膳錢也。奉。邑。本所食邑也。奉。扶用反。